

**Maki Nasumo Naña Pol Siri
Pa Pan Li Nalelagaena Wa Lala
Nae Garu
KOREN
Visayuena Na Tusi Nene**

Komþasnen suniena plas na tusi nini

Maki nini pe mñaki naña Pol siri þesa pa le Koren lala naña amlelaga e Yesu. Naga siria komin suri viowa la suñalu e maliena kiena li nalelagaena lala nae yo nene, a naga mligan mñaki nene pano vena iila la. Sumñare nae Koren, Pol ke narui naga siaria.

Koren naga pupia pulkumali kiena le Kris lala, a naga pe pulkumali keviu na lepas naña Akaea, naña meke vatanon þarin suþe nae pulkumali naña Rom. Yaru nae purvanua taþena la moki asike e nene, a naga pe yo tai naña yaru la akila ruruia e lepas na kilaen yumñaena na tauluen kilavaru, a e lepas na kiela þelaga marua. A la nae yo nene, kiela kia keviu e yomarava komin kiela þelaga viowa lala, a naña amlotun ke ntewa taþena la moki.

Suri kerkeviu la naña Pol pisayu e kiena mñaki nene sanini:

pisayu napiowaena naña yaru na sumñare la asuñña amliþere la,

pisayu napiowaena naña la asuñña akila ke piowa pa sira lala,

pisayu mrapa mesmesu na kilaen talovaena,

pisayu sanape e kinanena lala naña akila kuñañaena e la van nono lala.

Pol pisatañe kiela naviuniena lañasa, ana pian la e mrapa mesmesu na tavevena vena alotu e suñare, amio ñareraena la naña Ninuna Wa suña kian ke pa suñare, a nalelagaena naña yaru kilia mali sina. Pol kila meraravan naña kilia ruru napiowaena a navisatañeena la nene, a pisa meraravan naña lologa wo kiena Yesu ga kilia la navisatañeena van la.

E marana na keviu 13 pisayu ñelaga na sinesien Ntewa amio yaru lala naña pe ñelaga keviu tai naña yeririna kiena Ntewa la monar atavevea. Marana na keviu nene pe kompasnen visena kiena ne Ntewa naña yaru la akilia ruruia, taulu kompas tañena la na tusi nene.

Kompasnen tusi lañas nene

Visena ñesa 1:1-9

Yaru na suñare la amliñere la 1:10—4:21

Mlamulena viowa amio sira, a malena na mratava 5:1—7:14

Li nalelagaena lala a yaru la naña aminue Ntewa 8:1—11:1

Mrapa kiena li nalelagaena lala na kilaena lotena 11:2—14:40

Yesu mali sina, a yaru la naña alelaga ea akilia amali 15:1-58

Nalaena naña aligan va van li nalelagaena lala nae Yutea 16:1-4

Visena maro 16:5-24

Pol sike gar Episas, pisa pokolulagi pona pokolemalo pan le Koren lala

¹ Erau nae Koren lala, inu naþa nesiri m̃aki nini piñasu pan amiu, inu Pol, naþa Ntewa sinenan sape neimi neve nalologena tai kiena narina Yesu Kristo, ana pio inu, pisirlua inu vena nouarar yum̃aena na sanini.

Nesike e yo nini nemio kieta erau Sostinis, ana imimi lua mepisa pokolulagi pona pokolemalo pan amiu punu ga, ² nae sum̃are kiena ne Ntewa e pupia pulkumali nene Koren. Kam ke narui naþa Ntewa pio amiu aimi vena asikol amiu amio kiena li nalelagaena taþena lala, naþa asutetae asike e yo punu ga naþa asum̃a amlotun naga naþa kila ita tepe wa ruru rui, nane Yesu Kristo naþa naga pe kieta Suþe ita punu ga.

³ Memlen mesape lemamiena kiena ne Yesu Kristo a sum̃are kiena ne Ntewa arimata sike amio amiu.

Pol pisa potena pa Ntewa komin naviawaena kiena le Koren lala

⁴ Nepisu sane pogos naþa apim ape yeririna kiena Kristo Yesu, lemamiena kiena ne Ntewa sum̃a miyum̃ae keviu e kiamiu malena lala, ana silaga nesum̃a nepisa potena keviu vanonia.

⁵ Asum̃a apim apo manene laa e lepas na visawalen Lologena Wo, a asum̃a apa ke metava e lepas na kiamiu nakiliaena, e m̃ena ga e lepas na þelaga wo taþena make ga lala. ⁶ Pogos naþa nepisu nene, nepisu sa ga kiau yum̃aena la nanua ne, naþa nepian amiu e Kristo, nagane sum̃a þar ke pupia mrasa.

⁷ Nalaena lala pona nam̄areraena lala nāpa Ninuna Wa sum̄a kian pan amiu, pe tai re nāpa pe atol re poli wa, ana asum̄a amiyum̄ae ke amio la po pāisi, komin akirakiravan ke nāpa kieta Sūpe Yesu Kristo kilia imi m̄alivi si e yomarava nini.

⁸ Naga pe pimi m̄alivi re poli wa, ana naga sum̄a miila ita silaga vena tesum̄alu m̄arera tesum̄a ga vano-o tol legiena maro nene, ana pogos nāpa tesum̄alu tese marana ne Ntewa, yoko naga kila nāpa naviowaena tāpatete se ita.

⁹ Ntewa pisaar rui vena viewo ita, ana tekilia towasine ruru kiena visena nene, komin naga pio ita, p̄ere ita sikol ita teve erau wo temio narina, Yesu Kristo kieta Sūpe.

Sum̄are sum̄a mlilīpere pāisi

¹⁰ Kiau namratava lala kiena kieta Sūpe Yesu Kristo, nesape neviun manene van amiu e kiena kia, nesape āionli nāpa aim ave taaga sina. Popon ve alilīpere amiu re, ana amiu, kiamiu sitomena a kiamiu visena monar ve taaga.

¹¹ Nepisa visena la nene, komin la nāpa puna yaru nene Kloe apim apisawal pan inu asape veveyuena sike likan amiu, olai lala a vineu lala.

¹² Nemloge nāpa amiu peve taaga asum̄a apisasa ke kiamiu p̄egas lala asape “In na yoko netaveve Pol,” pona tāpena sape “O, in na nepe kiena Apolos,” pona tai sina, sape “O, in na nesikol inu e p̄egas kiena Kēpas.” A lāpas sina, apisirilua si kiela narin p̄egas lāpasia, akoven

plan taŕena lala, asape “O, imimi ga mepe yeririna kiena Kristo lelaga.”

¹³ Ke, ya ne akila ke sanene? ?Pona popon tetewowa Kristo ve kinakinasa, teliwerwere e kiamiu narin ŕegas la sanene? ?Pona laŕas asape ape kiau Pol, komin naŕa asitom asape in ke narui naŕa netelan inu e laki torovia vena netamalia la? ?Pona laŕasia sinela ŕesan naŕa akeela e kia kiena Yesu, ana asitom asape akeela e kiau kia?

¹⁴⁻¹⁶ Sanene, nepisu pogaga naŕa nanua ne, pe nekee amiu re nena tai poli, Krispas ga lalua Kaias, pona sineu ŕesania, nekee m̄ena Steŕanas amio namratava puna, a pe nesitoñal re si po laa rui, sane la ga nene, pona laŕas sina? Nepisa sanene komin naŕa visae nekee amiu ve moki, pona asuñalu avis vilaveena rui, asuñã avisave “!O, imimi ke narui, naŕa Pol kee imimi e kiena kia!”

¹⁷ Sanene piowa ga, komin Kristo pe mligan inu re nepimin keen yar la poli, ana mligan inu nepimin lologonen kiena Lologena Wo van la. A pogos naŕa nemlologon ke sanene, pe nekila re nemio m̄areraena na manmaruaena na yomarava nini poli, ana nekila amio m̄areraena na laki torovia kiena ne Kristo.

Kristo kipian manmaruaena a m̄areraena kiena ne Ntewa

¹⁸ Ana yaru la naŕa asuñã ataveve ke mrapa na kovioena, amloge visena na laki torovia kiena ne Kristo sane suri tai naŕa pe sur korena ga

pan la, ana ita la naña tetaveve ke mrapa na malena, temloge visena na kiena laki torovia sane m̃areraena kiena ne Ntewa natamalia itaena.

¹⁹ Naga nene sane visena kiena Siriena Wa tai, naña Ntewa pisa sanini, sape
*“Yoko nowe plan manmaruaena kiena la naña asitom ke asape ape manmarua,
 yoko nekilawo nakiliaena kiena la naña asitom ke asape akilia suria.”* *Ais 29:14*

²⁰ Ana visena nene pe lelaga pañisi, komin naña tepisusu yomarava, tekilia teviun tevisa sanini tevisave awa kiena yaru na manmaruaena lala? Awa yaru la naña apisuveve ruru kiliaena la naña sike e tus lala? Awa yaru la naña akilia avisayu ruru sitomena la naña pe tañena pe tañena naña tetelivi ke nagane? Tepisu sane peraga yo, a tepisu sane Ntewa kila manmaruaena lala na yomarava nini apimi sane sur wowe ga tai rui.

²¹ Ntewa ga pe manmarua, a e kiena manmaruaena, naga kila sane manmaruaena na yomarava nini tañatete kilia kila yaru kilia naga. Ana naga pisa sane po laa sane vena kila naña kiamimi lologena lala, naña yaru la asitom ke asape pe wowe ga, kilia tamalia yaru naña mlelaga ea.

²² Le Yu la moki liu naña yepela mavin lelaena, asumã apisavisa ke asape visae mekila kile lala, yoko alelaga ga na wa, a le Krik la moki liu yepela mavin lelagaena, asumã apisa ke asape visae mevis mesmesu nena e kiela nakiliaena marua lala, yoko alelaga ga na wa,

²³ ana pe mekila re sanene pan la poli. Memlologon ga Yesu pan la, mesape naga marewo kiela mlamulena viowa lala e laki torovia, ana visena nene, le Yu lala asape tařatete alelaga ea, a le Krik lala, asape visena na wowe ga nene.

²⁴ Ana e lepas kiena ne la nařa Ntewa pio la vena ave kiena, sane ita, nařa ita lařas tepe le Yu a ita lařas tepe le Krik, pe sa re nene poli. Ve tesitom re tesape tevisu kile tařena, komin nařa tepisu kilale řareraena kiena ne Ntewa e yuřaena kiena Kristo rui, a ve tesitom re tevisave tetaveve kiliaena tařena, komin nařa tepisu kilale namanmaruaena kiena ne Ntewa e mrapa kiena Kristo natamalia itaena.

²⁵ Yaru tařena lala apisu nařa Ntewa tařan Kristo mare e laki torovia, asitom ke asape Ntewa malumu ga, ana peraga. Sur nene kila meraravan kiena řareraena nařa řarera laa sane, taulu řareraena kiena yaru. Apisu sur nene, asitom asape Ntewa pe wowe ga, ana peraga, kipian kiena manmaruaena nařa po manene laa taulu manmaruaena kiena yaru.

²⁶ Wolai a vineu lala, asitomyuli sane kam na sanapen nařa Ntewa pio amiu ape kiena? Pe ita moki re poli nařa e lepas na visuena na yomarava, ita temanmarua, pona tepe yaru řarera, pona tepe yaru kerkeviu lala. ²⁷ Yomarava nini sape tepe wowe, ana Ntewa řere ita, ana kome ita suřa kila plan ke manmaruaena na yomarava. Yomarava nini sape ita temalum ga, ana Ntewa řere ita, ana kome ita, suřa kila ke řareraena na yomarava pito tano. ²⁸ Yomarava

nini pisa ke sape ita yaru korena ga naña tesike tano, ana Ntewa ðere ita, ana kome ita, sumña kila ke pupia sur kerkeviu la pito tano, kila apimi ape suri korena.

²⁹ Sanini, pe yar re nena tai naña kilia visirlua naga e marana Ntewa, sape naga pe manmarua, pona naga mñarera, pona naga yar tai ne, ³⁰ ana Ntewa ga pe purþes nen kieta malena viu temio Kristo Yesu. Naga ke narui pitetalia Yesu pimi kilologia mrapa pan ita, ana Yesu pul plan ita, kila ita temesmesu e marana, kila ita tepimi tepe kiena yaru wa lala.

³¹ Ana komin suri ne nanene, tepisu naña visena kiena ne Tusi Wa tai pe lelaga paþisi, naña pisa sanini, sape
“Yaru naña sinenan sape warwaria, naga kilia warwarian ga kieta Suþe.” *Ser 9:24*

2

Pol mlologon lak torovia kiena Yesu e mñareraena kiena Ninuna Wa

¹ Erau lala, nanua kam na aminue visena kiena ne Ntewa lala, ana nepim nepisawal pan amiu. Ana sa ga naña apisuia, pogos naña nepimin nekila, pe nekila re naña nepilaven visena piayavi lala pona manmaruaena kiena yaru. ² Nekila kiau sitomena mñarera nesape pogos naña nesike likan amiu, yoko ve nesitoñal re si sur taþena, ana yoko nelologon ga Yesu Kristo, amio kana marena e lak torovia. ³ Nesike nemio amiu, nemloge sane yepeu malumu paþisi, nemarau, sineu kurkur, ⁴ a kiau visena a kiau

suniena pe pulen re nena manmaruaena pona kiliaena kiena yaru. Ana e pogos nene, amloge naþa kiau visena lala apulen m̄areraena kiena Ninuna Wa, ⁵ a kila sane kiamiu naviawaena pe suñal re su e visena na manmaruaena kiena yaru poli, ana suñalu su e m̄areraena kiena ne Ntewa.

Manmaruaena kiena ne Ntewa

⁶ Lelaga naþa kiau visena pe pulen re visena lala na manmaruaena na yomarava nini poli, pona kiliaena kar la naþa yerkaawa na yomarava nini la akekarana poli, ana pogaga, komin yomarava nini amio kiena yerkaawa lala yoko avano amap ga. Ana kam la naþa kiamiu sitomena marua ruruia, apisu kilale naþa kiau visena lala pulen ruru nena manmaruaena kiena ne Ntewa.

⁷ Kiena manmaruaena nene, naga þarpolo ruru sike pa rui sumon naþa naga si yomarava nini, ana manmaruaena nene tapolou ruru suñã ga, yar la pe akilia re nena ga, ana nagane narui molue merarava ruru ga pan ita na wa sane pupia visaruruena tai naþa Ntewa mlavia vena kila ruruiaena. ⁸ A kiena manmaruaena nene m̄alivin ita e mrapa naþa Yesu pimi tamalia ita, ana yerkaawa na yomarava lala pe apisu kilale re sur nene poli, ana atarar Yesu, naþa naga pe pupia Suþe na urarena nae ma e peni, la atelanm̄ar naga metava e laki torovia. ⁹ Yeririna la pe apisu kilale re sitomena kiena ne Ntewa sanene poli, naga sane Siriena Wa tai, naþa pisa sanini sape

Sur nowo la naþa kilamarana yaru pe pisuli re poli wa, pona kiligana yaru pe mlogeli re

poli wa, pona los nen yaru pe sitomli re poli wa,

ana sur ke la nene Ntewa kila ruru suña ga pe kiena ne kiena yaru la naña sinela si naga.
Ais 64:4

¹⁰ Ana ita, ita na tekilia navisa ruruena la nene, komin Ninuna ne Ntewa naña pisu kilale make suria, a kilia make sitomwanena kiena ne Ntewa, naga kipian itania. ¹¹ Sa ga ita yeririna, naña yar tañena mninue ya naña sike e kieta sitomena, ana ninuta ga kilia ruru po. Ana maran taaga mña sa nene e Ntewa. Pe tekilia re ya naña sike e kiena sitomena poli, ana Ninuna ga kilia mña, ana pisawal pan ita. ¹² Pe ninuna na yomerava re ga nini tai poli naña pisawal pan ita, ana Ninuna Wa nene naña molue ma puna Ntewa pitomi, naga ke narui naña kila ita tepisu kilale ruru nalaena wo la naña Ntewa suña kian ke pan ita.

¹³ Sanene, popon avisu kilale mña sane ki-amimi visena la naña pimi ke pan amiu, pe amolue re e manmaruaena kiena yar poli, ana Ninuna Ntewa ga suña pian itania. Sanene, mesuña moñar ke visena lelaga lala kiena Ninuna Wa nene, ana memligan sike e amiu naña Ninuna nene sike e kiamiu malena rui. ¹⁴ Yar naña Ninuna pe su re e kiena malena poli, naga tañatete visu kilale sur lala na Ninuna, naga sane pe yar tetan ga e la, ana naga tañatete nena tol mñareraena la naña Ninuna kiania. ¹⁵ Yaru naña Ninuna sike e naga, yoko naga kilia visu kilale ruru sur make ga, ana yar naña Ninuna pe su re e naga poli, naga tañatete visu kilale ruru ya

naña sike e malena kiena yaru naña Ninuna sike ea. ¹⁶ Visena Wa pisa sanini, sape
*Pe yar re nena tai naña kilia ya naña sike e
 sitomena kiena ne Ntewa poli,
 pe yar re nena tai naña kilia vian si sur va Ntewa
 poli.* *Ais 40:13*

Visena nene pe lelaga pañisi, ana e ita naña Ninuna sike e ita, tetol sitomena kiena Kristo rui.

3

Pe pon re veveyuena su likan nalelagaena la poli

¹ E pogos naña nesike nemio amiu nanua ne, sineun nesape nevis ruru nemio amiu sa naña kam na ape yeririna naña Ninuna ne Ntewa sike e kiamiu malena rui, ana peraga. Nepisu sane kam na pe atoroki re poli wa, nane kila narui nepis pan amiu sa naña kam na ape yar na yomarava ke ga wa, naña e lepas na kiamiu malena amio Kristo, kam na sa ke sisi tomtom lala wa. ² Sanene, nepagan amiu e ga e yu, tañatete nela kinanena m̄arera van amiu, komin kam na pe atorokin re poli. Ana pimi tol nagane, nepisu sane kam na pe atoroki re poli wa, ³ komin naña ðelaga na yomarava nini mok liu sike likan amiu wa. Pona kam na pe apisu kilale re poli yo, ana pogos naña vielueena amio veveyuena sike e amiu, kana kinasa sane asike e yemalolo na wa, kiamiu ðelaga sa ga ðelaga kiena yaru. ⁴ Merarava ruru po pañisi naña amiu na sanene, komin naña asum̄a amlipere

amiu ke sanene. Kam laṗasa asuṃña apisa inu, asape “Aulai, imimi na mekekaran Pol, metaveve naga,” a kam laṗasa asuṃña apisa ke erau nalologena Apolos nene, asape “Ke, imimi na mekekaran Apolos, metaveve naga,” ana sitomena sur la ne sanene, sitomena kien yar ga.

⁵ Visae sinemiun avisayu kiamimi kia imimi lua Apolos, popon asitom ruruia avisave imimi lua mepe yar sur na sanape? Imimi lua mepe yar kiena Suṗe ga, vena kilaen yuṃñaena naṗa mligan sike e limamimi, vena kila sane akilia alelaga ea. ⁶ E lepas na yuṃñaena nene, in ke narui nemapila kurusia, a Apolos ke narui naga ṗeleule susia, ana Ntewa ga naṗa kila purṗesia kapuru pimi kerkeviu ṗar mrasa. ⁷ Ana monar tevisu kilale sane yar naṗa mapila kurusa, a naga naṗa ṗeleule susia, lalua pe akila re pupia sur tai poli, ana naga naṗa kila purṗesa pimi keviu ṗar mrasa, naga ke narui kila pupia suria. ⁸ Ana imimi lua, naṗa tai mapila kurusa, a tai ṗeleule susia, imimi lua memiyuṃṃae maran taaga ga, a yoko imimi luoka ga mowar kiamimi nalaena torokin kiamimi yuṃñaena. ⁹ Pe sa re naṗa imimi lua, imimi yar tai naga po, a tai piowa ga, ana imimi lua mepe yar na yuṃñaevaiena lele taaga kiena ne Ntewa, a amiu na sane porotano naṗa memiyuṃṃae ea.

Pona kana totou taṗena na visaena, nekilia nevisave kam na sane yuṃña tai naṗa Ntewa suṃña miyuṃñaenia. ¹⁰ Ntewa mla kiliaena wo pan inu, ana nemiyuṃṃae sane yar tai naṗa

yepena m̃aen yuṃaena, nemiyuṃaen p̃eren yuṃa tai naṓa m̃arera ruruia sike na. Ana siraunia, pe in re naṓa nepisirlua yuṃa metava e p̃erena nene poli, ana erau taṓena nene pimi suṃa miila nayuṃaenen yuṃa. A kam ke sina ga laṓasa akilia aiila nakilaen yuṃa metava e kana p̃erena nene, ana yaru naṓa yuṃaen sanene monar visuar ruru kana p̃elaga na yuṃaenena.

¹¹ Naga monar taṓatete liganli si p̃erena taṓena, komin nemligan p̃erena napo rui, nane Yesu Kristo. ¹² A pogos naṓa amiyuṃaen yuṃa metava e p̃erena nena, pona laṓasa amiyuṃaen e kol pona selpa pona kilavaru m̃arera, pona laṓasa amiyuṃaen e laki pona m̃aero pona m̃akururuye. ¹³ Ana siraunia, yoko kapi na legiena maro kekania kilali kiela yuṃaena lala, kila yuṃaena la naṓa akila, m̃alivi e yo metava.

¹⁴ Visae kapi tol yuṃa naṓa yar tai pisirlua metava e p̃erena nene, ana kekan p̃ele ga, yuṃa suṃalu ruru suṃa ga, yoko yar nene war kiena nalaena wo tai. ¹⁵ A visae yar taṓena, kapi kekan make kiena yuṃaena, yoko yar nene kilalu make kiena suria. Lavis kapi nene kilia kekanñar m̃ena yar na yuṃaena nene, ana pona naga purmatan kapi nene, tamalia kiena malena.

¹⁶ A kam na monar avisu kilale sane yuṃa nene naṓa amaplar metava e p̃erena nene, naga kam li nalelagaena lala, a sane yuṃa na lotena wa tai m̃ana Ntewa, naṓa Ninuna suṃa loyuṃa ea. ¹⁷ Yuṃa na lotena kiena ne Ntewa naga kam ga ne, a visae yar tai sinenan sape kila kare yuṃa

nene, yoko Ntewa welua nena naga, komin kiena yuṁa na lotena nene naga pe wa paṁsi.

¹⁸ Amiu monar ala ya naṁa nepisa ke ne, pe pon re asitom avisave naga pe sur korena ga. Visae amiu yar tai sitom ke sape naga pe manmarua ruru po e nakiliaena na yomarava nini, popon manene naga ligan sitomena navisokanena la nene sike na. E lepas nakiliaena na yomarava nini, naga monar kila naga sane yar ga tai naṁa pe wowe, ana visae naga kila sanene, yoko naga kilia ve manmarua ruruia e nakiliaena lala kiena ne Ntewa. ¹⁹ E Visena Wa, tepisu visena tai naṁa kila meraravan sape manmaruaena na yomarava nini sane sur wowe ga e marana Ntewa, naṁa pisa sanini, sape

La naṁa asitom ke asape la ape manmarua ruru po e yomarava nini, asitom ke asape la akilia suria, ana e marana Ntewa la ape wowe ga, naga pisu kilale la ruru rui. Sop 5:13

²⁰ A visena taṁena sina sanini, naṁa sape

Suṁe pisu kilale ruru sitomena lala kiena li na manmaruaena la na yomarava nini, sape ape sur korena ga. Yauena 94:11

²¹ Sanene na, ve tevilaven re sitomena na yomarava lala. Taṁatete akila sur wo tai van amiu, komin naṁa Ntewa kian kiena navisa ruruena wo punu ga pan amiu rui. ²² Inu Pol nemio Apolos a Keṁas, mekila yuṁaena wo punu ga pan amiu rui, a nagane yomarava nini sike e limamiu. Visae amal pona amare, visae asuṁa nagane pona ase legiena naṁa pimi ke ga wa, ana

sur punu ga ape kiamiu rui, ²³ a amiu ape kiena Kristo, a Kristo pe kiena ne Ntewa.

4

Yum̃aena kiena Pol amio Apolos sane nalolopena kiena Yesu

¹ Sanene na, amiu ve aligan imimi re meva metava, ana popon avisu imimi sa ga yar na yum̃aena kiena Kristo lala, naña naga mligan visawanena lala kiena ne Ntewa e imimi, vena mevisawal va la naña pe akilia re poli.

² A pupia sur naña sike e kiamimi sitomena, mekiliala sane monar memasisun ruru wo e yum̃aena nene naña kiamimi yerkaawa mligan e limamimi.

³ Pe nesitom manene re nesape aña amiu asitom ke sanapen inu, po yar la aliþere inu ve sanape, a in m̃ena pe nepilevilen in re sina poli nesape in na sanene pona sanene. ⁴ Lelaga, pona nepisu in ke sina ga nesape nemiyum̃ae pogaga ne, ana nanene kiau sitomena ga ne. Kiau sitomena nene taþatete kiliala kila inu nemesmesu, a Suþe ga naga pe yar naña torokin liþere inuena.

⁵ Ve sanene na, ve tokoskosin re liþereen yar taþena, ana monar tesum̃ate Suþe wasuþe e kana legiena na liþereena nena. E pogos nene, yoko naga la sur la naña atapolou asike e yemalolo, kila naña amolue e yomerarava, a yoko la sitomwanena la naña atapolou ke e los nen yaru, kila naña amolue e maran yeririna make ga. Yoko Ntewa waveve sur la nene, ana

yoko naga vis va yeririna lala torokin ya naña naga ñal e kiela malena.

⁶ Erau lala, visen la ne nesuña nepisa ñisi ne, nesuña nepisayu ke ga imimi lua Apolos ne, ana nekila sanene komin sineun nevian ruru amiu, sane ve avisusu re ve tañena e kiamiu navianena lala. Amiu lañasa apilave komin navianena na kiela ñegasa, a asuña apisusu ke piowa e navianena na ñegas tañena, ana sanene na pe mesmes re poli.

⁷ Kam punu ga maran taaga, kam na pe apo manene re taulu tañena la poli, a visae sur wo tai sike e amiu, pe kam re na amiyuñen poli. Ntewa ga kian pan amiu sane nalaena tai, ana sanene na pe pon re si avis vilave vanon poli.

⁸ Lelaga, nekilia nesape asuña asitom ke asape kam na limamiu pulen sur wo lala kiena ne Ntewa rui, ana amloge po, asitom ke asape kam na ape kiena yerkawa lala na yomarava nini rui, naña akoven imimi mesike nena varau. Visae lelaga naña sane kam na ape ñarin suñe lala kiena ne Ntewa na yomarava nini, po pañisi, ana pe nesitom re nesape sanene poli.

Ana visae pogos tai ve sanene, pona pe kam re ga poli yo, ana yoko Ntewa visu sane imimi lua ñena ga metorokin meto metava memio amiu vena ve suñenen kiena yeririna lala.

⁹ Ana nagane, imimi li nalologena lala pe mesu re e yo wo na sanene poli. Sane Ntewa mligan imimi mesike laa varau tano, naña yeririna na yomarava nini amio ñena navisi lala apisu kare

imimi, sane metorokin ke ga yaru lala naña amla koaena na marena pan la.

¹⁰ Memlogear ke Kristo, mekila ke kiena yuññaena, ana li tañena la apisu imimi sa ga mepe wowe towe ga, ana asuñña apisayu amiu asape ape manmarua ruru nena e malena kiena Kristo. Apisu sane imimi na memalum ga, ana kam na añarera. Apisu imimi piowa ga, ana amligan amiu asike metava.

¹¹ Imimi na pe sa re nena amiu poli, komin siar nanua pimi tol nagane, viso kar imimi, moto kar imimi, pe ñamimi kulsota wo re poli, mesuñña mepane ke pog ñarera lala, ñamimi yuñña wo re naña memon e poli, ¹² ana mesuñña memal ke ga e yuññaena na limamimi. Yar la apiuelin imimi, ana mepisa ruru la ga. Akila kare imimi, ana metamñan ga. ¹³ Apisa kare kiamimi kia, ana mekilali naña mepe erau ruru ga memio la. Mekila po sanene, ana akila imimi sa ga kororaki na yomarava nini. Lelaga, pimi tol nagane apisu imimi sa ga sur korena ga.

Pol piun sape ataveve lana

¹⁴ Pogaga, pe nepisa re visena la ne ne vena kila amiu amawa poli, komin kam na sa ga naruu lala naña sineu sii amiu pañisi, a sineun nevian ruru amiu. ¹⁵ Nekilia nesape yerkawa tañena la mok liu naña apisuar amiu a amiila kiamiu lelagaena e Kristo, ana popon asitoñal sane inu ga taaga nepe arimamiu. In na noñar ñesan Lologena Wo kiena Kristo pimi pan amiu, ana in na sane arimamiu e kiamiu malena amio naga.

16 Sanene na, nepisu sane mesmesun ga naþa nevis van amiu, noṃareran amiu nesape ataveveli lelen lau sumo.

17 Sitomena ne nanene kila nesape nevitetalia Timote iṃasu pun amiu. Nepisu sane Suþe taṃan naga pan inu sa ga naruu tai, komin naga miyuṃae ruru po e yuṃaena lala a nekekanan naga paṃisi. Ana pogos naþa visae imi ṃalivin amiu, sineun nesape naga kila amiu asitom ruru si kiau þelaga nayalena naþa nataveveen Kristo, sa naþa nesuṃa nepian ke pa yar lala na suṃare make ga la naþa nesuṃa neteteliv ke e la. 18 Nekilia sane pogos naþa apisu sane pe noṃalṃaliv re si pun amiu poli, kam laþasa akilali naþa amligan la sina asu metava.

19 Ana pogaga, komin naþa visae Suþe taṃan van inu, yoko ve ve piavi re neim noṃalivin amiu. E pogos ne nanene narui, yoko yepeu mavin logeen visena kiena la nene, ana sineun nesape nevisu sane kiela ṃareraena na kilaen yuṃaena ṃarera sanape.

20 Nanene komin naþa visena kiena yaru pe pe sur re tai poli loyuṃa e nasuþenena kiena ne Ntewa, ana ṃareraena kiena Ninuna ke narui naga pe pupia suria.

21 Pogaga, sineun nesape asitom ruru sumo, sane visae noṃalivin amiu, yoko ve sanape? Visae sinemiunia, nekilia neiṃasu pun amiu nemio kiau visena ṃarera lala na veveyuena, ana po manene laa visae akila kiamiu sitomena

la su tano sumo wa, ana nekilia neirmasu nemio ga visena la naña malumu, e ðelaga na sinesiena.

5

Pelaga viowa loyuña e suñare

¹ Visena pimi tol kiligau sape sur tai sike likan amiu naña piowa manene laa. Apisape kam yar tai, arimana pa talopa amio sira tañena, ana siraunia, yar nene pinaun wona arimana nena pimi sike amio. Lelaga kemua naña, yaru na yemalolo lala tañatete akila ðelaga nene, ana sanape na kam li nalelagaena tai suña kila?

² Kam li nalelagaena lala asuña apisir plan amiu, asape kam na amiyuñae ke po, ana sanape asuña atañan ke ðelaga na sanene suña miyuñae ke likan amiu? Popon aloge viowagan sur nene, a popon akovenlua yaru nene vetan kiamiu suñare.

³ Ee, lelaga naña nagane nesike e yo nini nesike laa perinan amiu, ana e ninuu nemloge sa ga nesike ga nemio amiu. Sanene na, e kia kiena Suñe Yesu, nesuña nepisawal ke naliñereena tai kiena yar nene sa ga nesuñal ke ga nesike e maramiu. ⁴ Sanene na, pogos naña aim si lele taaga, monar avisu sa naña ninuu sike ga amio amiu, a monar akilia sane Suñe Yesu ñena sike amio kiena ñareraena, ⁵ ana monar akovenlua yar nene vetan suñare. Naga monar ure sina, wasuñe si e yomarava va e limana Yermare, ana popon ðelaga lala na mlamulena viowa na yomarava akila naga loge viowa vano vano-o va

ĥisi, ana suraunia pona wasuĥe si imi yo, vena Suĥe kekaran tamalia ninuna e legiena maro.

⁶ Erau lala, pe pon re asuĥa awarwar manene amiu poli, avisave kam na amekiki, komin kororaki nene sike e amiu na wa. Kam na akilia rui sa naĥa narin is ga, ana kilia kila kilaparavi punu ga lapa. ⁷ Sanene na, popon vena awar plan is viowa nene naĥa sike e amiu, vena amiu punu ga aim aekiki ruru sina. Monar tesitoĥal sa naĥa yermarua lala asuĥa akila ke kuĥaĥaena e narin sipsip vena kilaplanen kiela mlamulena viowa lala, ana Kristo pimi mare e laki torovia vena warplanen kieta mlamulena viowa lala, ana pe pon re kororaki suĥa e ita poli.

⁸ Ana pogos naĥa yermarua la akila kuĥaĥaena ĥisi, akila kana ĥaĥagena nena, a ita nalelagaena ĥena lala ita ĥena kieta ĥaĥagena tai. Ana pe pon re tesike e ĥaĥagena nene poli, takan kilaparavi tai naĥa is marua sike ea. Visena nene kana kinasia sane pe pon re sane mlamulena viowa a ĥelaga viowa na malena marua suĥa ga e ita, komin loyuĥa e malena na suĥare, sur make ga monar ikiki ruru wo, ve lelaga ruru wo, a ve wa ruru wo.

⁹ Kiau visena tai pan amiu sanene rui. E ĥaki tai naĥa nesiri piĥasu pan amiu nanua rui nepisawal nesape pe pon re ava lele taaga amio yar la naĥa akila ke ĥelaga viowa la poli, pona asuĥa akiriri kar ke vanon sira lala. ¹⁰ Ana pona kam laĥasa amlogepal kiau visena nene yo, komin pe nepisa re e lepas kiena yar la naĥa pe amlelaga re poli. E la nene, la moki akila

kolau, la moki ape puluvis lala, la moki apinau, la moki amlotun kiela nono lala, ana visae sinetan tevisave tesu perinan la, pona monar teligan ga yomarava nini narui, komin naþa ita make ga tesike e yomarava, a tesuþa tepitawe ke yar sur na sanene silaga. ¹¹ Pe nepisalupar re nene poli, naþa tesuþa tepitawe ke yar kar na sanene e kieta yalorena, ana ya naþa sineun nesape nevisa, sineun nesape visae yaru tai suþa ga, neþa naga pe nalelagaena lelaga tai, ana apisu ke naþa e kiena malena naga suþa taþa ke kolau, pona suþa pe puluvis lue ga, pona suþa mlotun ke nono lala, pona suþa piuel, pona suþa mun kuruta namunena, pona suþa pinau, ana pogaga, yar sur ne nanene narui ve akila re nena sur tai amio naga. Yoko ve ava re lavisinia, ve akinana re lele taaga amio.

¹² Ve sanene na, e lepas kiena la naþa asike vanua e suþare, pe pe kieta re naþa teliþere kiela malena poli, ana e lepas kiena la naþa asike loyuma e suþare, monar tevisuveve ruru la. Visae laþasa asuþa akila ke þelaga na mlamulena viowa la naþa sane nepisa ke ne, monar teliþere la, a monar tekila sur tai van la.

¹³ Ntewa ga yoko liþere la naþa pe asu re loyuma e suþare poli,

ana e lepas kiena yar nene naþa suþa kila ke þelaga viowa likan amiu, kam ke narui monar akoven lua naga vano. Naw 17:7

6

Pelaga wo na kilaruruen veveyuena

¹ Nemloge m̃ena sane pogos tai, kieta puruvi tai na suṃare naga pepeyu amio amiu taṓena tai, ana naga suṃalu p̃ere taṓena nene pa e pupia kumali apis pania. Nepisu sane sur nene pe memes re nena poli, komin naṓa pe pon re yar la naṓa amlelaga e Ntewa ava asuṃalu e marana yerkawa la nene naṓa pe amlelaga re e Ntewa poli, vena yerkawa la nene aliṓere la.

² Pogos naṓa li nalelagaena lala aveveyu, popon li nalelagaena taṓena ga lala akila ruruia, komin naṓa monar tesitoṃal tevisave ita li nalelagaena ke la narui naṓa teliṓere yeririna lala na yomarava e legiena maro. Ana visae ita ke narui naṓa yoko tekila pupia yuṃaena na sanene, pona amiu atorokin naṓa akila ruru kiamiu narin veveyuena la ne sanene. ³ Yoko Ntewa ligan ita vena teliṓere navisi lala nae peni, ana pogos naṓa li nalelagaena taṓena lala avisin sur na yomarava nini, sanape? Apisu sane ṃarera paṓisi, taṓatete akila ruruia?

⁴ Peraga, monar akila. A visae peraga, pona asitom asape popon amiu li nalelagaena lala aligan kiamiu visena e limana yar taṓena la naṓa pe asuṃa apim re e suṃare poli?

⁵ Nepis ṃarera sanene komin naṓa sineun nesape nekila amiu amawa towe laa ga! Ee, nemilan manene paṓisi navisuen sa naṓa pe amiu re nena tai naṓa pe manmarua poli, naṓa kilia kila ruru kiamiu veveyuena la nene. ⁶ Pona sur ne nanene narui kila sane kieta puruvi taṓena na suṃare suṃalu mligan puruvi taṓena nene pa e pupia kumali, ana suṃa pisawal ke

kiena napiowaena lala e marana pupia yerkawa lala e totanoena nene, la naña pe amlelaga re e Ntewa poli?

⁷ Nesumña nepis ke pan amiu sanene e lepas na mrapa naña monar atavevea vena kilaru-ruen veveyuena la naña sike likan amiu, ana po manene laa visae ve veveyuena re mña ga. Veveyuena la ne sanene, kana kinasa sane Yermare sumña taulu amiu rui. Pona pe akilia re poli yo wa, naña visae womla tai kila viowa van ko, pona vinaun kioña sur tai, ve ositom re, otañan ga, komin mlamulena viowa naga kiena.

⁸ Ana visae osuñalu sinoñan oligan yar nene e pupia kumali vena ala nakoena vania, ko ke narui ko osuñala okila ke piowa pan womla nene.

⁹ Monar asitoñalia sane la naña kiela malena pe memes re poli, yoko tañatete avisu nasuñenena kiena ne Ntewa imi mñalivi pu la. Pe pon re akilali akila sa naña amninue ke sur nene na wa, komin akilia rui asape Ntewa pe kekaran re nena la naña asuñala amiyaloro kar ga, pona la naña amlotun ke ga ntewa navisokanena lala, pona la naña akila ke kolau, pona la naña asuñala añiliwilin ke tasnela, pona yermene pona sira la naña asuñala añere la ke sina ga, ¹⁰ pona la naña asuñala apinau, pona la naña pe apion re kiela sur pa yar tañena la poli, pona la naña asuñala amun wii, pona la naña apiueli, pona la naña akila urlelai.

¹¹ Lelaga naña, nanua sumo kam lañasa akila sanene rui, ana potena pañisi naña Ninuna Wa kevan amiu amekiki, kila amiu ape wa, a kieta

Suŕe Yesu Kristo kila ita temesmesu ruru sina e marana Ntewa.

Tasneta monar ikik ruru wo

¹² Nepisawal ŕelaga viowa la nene, naŕa pe pon re tekila poli, ana yar laŕasa pe sinelan re kiliaen poli. La apisa sanini, asape “E, kiau malena naŕa, nekilia nekila ya naŕa sineun nesape nekila.”

Ana nevisataŕe la, nesape “Lelaga, pona ki-amiu malena yo, ana avisuaria, komin sur moki liu naŕa sinoŕan kilaena, akilia akila kioŕna malena imi viowa ŕena ga. Sur mok liu naŕa sinoŕania osape suŕna e kioŕna malena, ositom osape okilia okawe ruru woga, ana peraga, yoko ovisu naŕa sur ke la nene narui yoko akawe ruru si kioŕna malena.”

¹³ A yar si laŕasa naŕa sinelan asape akila ya naŕa la sinelania e tasnela, la asuŕna apisa ke visena taŕena tai, asape “Kinanena, naga na ŕeŕeu, a ŕeŕeu, naga pe na kinanena.”

Ee, lelaga, ana ovisuar ruru sina, komin naŕa yoko Ntewa kila sur lua nene ava akovio na wa. Sanene na, Suŕe mla tasneta pan ita vena ve kieta, ana ita monar tela tasneta tela si vania. Tasneta vena kilaen kiena yuŕaena, ana pe nava kareena re ga poli. ¹⁴Visae tetarŕan tasneta vena kilaen ga yuŕaena wo lala, yoko e legiena maro Ntewa kilia visirlua si tasneta, sa naŕa pisirlua tasnena ne kieta Suŕe Yesu rui, e kiena pupia ŕareraena. ¹⁵ Monar tekilia sane tasneta lala la sane komŕas nen tasnena Kristo. Ana sanape, popon komŕas nen tasnena ne Kristo tai va sikol

si amio sira na mrapa tai? Tařatete ve sanene řisa!

¹⁶ Ana Visena Wa pisa sanini, sape “Yoko yermene amio sira, lalua aim ave taaga,” ana yar nařa va amio sira na mrapa tai, kila nařa tasnena pimi pe taaga amio tasnena sira nene.

¹⁷ Pe mesmesun re yar tai kila sanene poli, ana monar tesikol ita temio Suře, nařa ninuta imi ve taaga temio Ninuna. ¹⁸ Monar tevisuar ruru wo e mlamulena viowa la nařa yar la akilia akila amio tasnela, e lepas na yermene amio sira. Mlamulena viowa tařena la nařa asuņa akila, asuņa akila ke piowa ga pa e yepen yar tařena, ana yar nařa kila mlamulena viowa amio sira, suņa kila ke sina ga piowa pa e yepena.

¹⁹ Ve sineta řesan re, sane tasneta na sane yuņa wa na lotena tai nařa pulen Ninuna Wa nařa Ntewa mligan sike loyumuņa e ita. Ana tasneta nene, pe pe kieta re mņa poli, ²⁰ ana pe kiena ne Ntewa, komin nařa naga pul lua kieta malena e marena kiena Yesu. Sanene na, monar teyuņae temio tasneta vena kilaen ga sur la nařa asuņa avisirlua kiena kia.

7

Talopaena

¹ Pogaga, nagane yoko nevisawal sitomena lařasa e nařa apiun tan inu e lepas na talopaena, asape popon tetalopa, pona popon tesuņa ga sanene?

Ana pogaga, yoko nevisa ve sanini. Visae yaru tai sitom ke sape ve talopa re, naga nene pogaga, pe pe sur re tai poli. ² Ana komin naþa tepisu naþa nataþaliena pimi m̃arera, a nataþaena lau pule manene la, popon manene yar make ga aure wola lala.

³ Sanene na, visae yar sinenan sape va lavisin wona na sira, wona nene monar kekarania, a pogos naþa sira sinenan sape va lavisin wona na yerm̃ene, wona nene monar kekarania. ⁴ Sira naþa talopa taþatete visave tasnena pe kiena naga taaga, ana wona na yerm̃ene kilia visave naga pe kiena m̃ena ga. Ana yaru naþa talopa taþatete visave tasnena pe kiena naga taaga, ana wona na sira kilia visave naga pe kiena m̃ena ga. ⁵ Sanene na, tai ve visaluþar re taþena visave ve imi re lavisinia.

Ee, pona pogos tai lalua apisayu yo, lalua ataþan naþa lalua aligania, ve amon re lele taaga e narin pogos tai, vena kila lalua akilia alen m̃arera vanon sur tai wa, ana nanene na pogaga. Ana siraunia, lalua monar sinelan si aim lele taaga, komin visae peraga, pona Yermare visu kilale naþa tai malum ga, taþatete uarar naga, ana kila loru e nataþaliena koyo tai.

⁶ Sur la naþa nesuþa nepisa ke ne, pe nepisa re sane navisaluaena m̃arera tai poli, sane yar monar talopa, pona monar ve talopa re, ana nemla ga sitomena naiilaena laþas nene. ⁷ Visae yar make ga akilia asuþa ga sane inu, naþa pe netalopa re poli, nesuþa ga sanene, pona yoko vera na wo na wo, ana sur nene sike ga e sitomena naþa Ntewa mlavia pan ita peve taaga.

⁸ Nesape nevisa visena tai van la naþa asu m̃aga sanene, sane la naþa pe atalopa re poli wa, amio letano lala. Nepisu sane visae akilia asuñã ga sanene, sane naþa in m̃ena nesuñã nekila ke ne, yoko wo na wo. ⁹ Ana visae laþasa apisu sane peraga, yoko m̃arera van la vaþisi vena auarar la lue ga sanene, pogaga, po paþisi naþa visae alual tai naþa atalopa amio. Pe pon re nataþaliena suñã kar la sanene vano-o asuñã aloge viowagania silaga.

¹⁰ Visena taþena si tai naþa sineun nesape nevisa, naga van la naþa atalopa rui, naþa pe kiau sitomena re ga poli, ana naga pe visena tai naþa Suþe mlavia sane visena m̃arera tai pimi pan ita. Pisa sanini, sape sira monar ve ure matan re wona na yerm̃ene. ¹¹ A visae pogos tai sira tai ligan wona na yerm̃ene, ure matan sina, naga monar ve talopa re sina, ana monar suñã ga sanene. Pona visae peraga, popon naga amio wona na yerm̃ene lalua akila ruru marala, lalua asu si lele taaga. A yerm̃ene lala, ve añene plan re si wola na sira lala.

¹² Pogaga, yoko nevisawal si suri taþena laþasia. La pe sa re navisaluaena kiena Suþe poli, ana sane kiau sitomena ga laþasa vena iila itaena.

Suri þesia, naga e lepas naþa yaru tai naþa mlelaga e Yesu sike amio wona sira tai, ana sira nene mlelaga re poli. Ana visae sira nena kekaran ga naþa lalua asuñã veraga, po pon re yaru nene sitom sape m̃enelua si sira nene

poli. ¹³ A maran taaga m̃ena ga visae sira tai m̃elaga e Yesu sike amio wona yerm̃ene tai, ana yerm̃ene nene pe m̃elaga re poli. Visae yerm̃ene nene kekaran ga nãpa lalua asum̃a veraga, po pon re sira nene sitom sape m̃enelua si yerm̃ene nene poli. ¹⁴ Nanene komin naga e lalua nãpa m̃elaga kilia kila suri wo tai van nãpa pe m̃elaga re poli, ana kiena p̃elaga wo kilia kila kiela talopaena lalua imi wo vãpisi sane talopaena kiena yaru lalua nãpa am̃elaga. A naga e lalua nãpa m̃elaga kilia kila suri wo tai va narila lala, komin naga yoko kilia ligan ruru narila lala e mrapa na malena wa, yoko akapuru loyum̃a e mratava tai nãpa po sa ke ga ninis tãpena la nãpa arimala amio anela la ga luwoka am̃elaga. ¹⁵ Ana e lepas kiena lalua nene nãpa tai m̃elaga a tai pe m̃elaga re poli, visae nãpa pe m̃elaga re poli sinenan sape ligan lua si nãpa m̃elaga, ita li nalelagaena tãpena lala monar tetam̃an ga sanene narui. Visae nãpa pe m̃elaga re poli yepen mavin nãpa m̃elaga, tãpatete tekilali nãpa tom̃areran nãpa m̃elaga sum̃a amio wona nãpa sinenan sape ligania, komin Ntewa sinenan sape tese malena tai nãpa pulen p̃elaga na sum̃are.

¹⁶ Ko sira nãpa om̃elaga, pona ko yerm̃ene nãpa om̃elaga, pona ositom osape okilia otaulu si wom̃a nãpa pe m̃elaga re poli, ana peraga, pe okilia ruru re nãpa osape yoko ve sanene poli, komin pona tãpatete nena otauluia p̃isa, peraga.

*Monar teva ruru ita tesum̃a e malena nãpa
Ntewa mligan ita tesike ea*

¹⁷ Ana ya ga naña monar tekila, ita make ga monar teligan ruru kieta malena ita punu ga su ruru e naña kieta Suþe mligan ita tesike e rui, pona monar teyali ga e mrapa naña Ntewa pio itania vena teyal ea. Nanene naga visena tai naña nemligan sike e kieta sumare lala.

¹⁸ Visena nene kana kinasa sane e nape naña osike ea nanua, sumon naña omlelaga, monar okekaran osuũa ga ea wa, pogos naña osiar omlelaga. Sanene visae laþasa ape le Yu la yo, naña asuũa ataveve ke kiela þelaga marua lala, sane þaviu pona ya sina, nanene na pogaga, pe nepisa re nesape visae pogos naña alelaga ana monar avilopu kiela þelaga marua la naña asuũa ataveve ke poli. A maran taaga mēna ga sa ke la naña pe ape le Yu re poli, naña pe akila re þaviu poli ana asuũa ataveve ke kiela þelaga marua taþena lala. E mēna e kiela lepasia, pe nepisa re nesape visae alelaga monar avilopu la e kiela þelaga marua la poli.

¹⁹ Yaru taveve þelaga marua ya, sane ve þaviu pona ve ve þaviu re, naga pe pe suri keviu re tai poli e navisuena kiena ne Ntewa, ana Ntewa sinenan ga sape tetaveve kiena visaluaena.

²⁰ Nane nepisa ke pan amiu narui nesape pogos naña olelaga, ova ruru ko ga osuũa e yo naña osike ea pogos naña pe omlelaga re poli wa.

²¹ Sa ke ga naña visae omiyuũae korena kiena yaru tai nanua sumo, ana nagane omlelaga ga na wa, nanene pogaga, monar okekaran naña oyumuũae korena ga sanene. Ana lelaga, visae pog tai olual kiomuũa pulmas tai naña okilia ourmatan e naña omiyumuũae korena

ke ea, naga m̃ena nene popon õpisia. ²² Visae ko na omiyum̃ae korena kiena yaru tai, monar ositom̃al sane pogos nãpa Sũpe vio ko, naga visirlua ko ligan ruru ko nenaga e namratava puna. Ana e kana lepas ne tai, visae ko pe omiyum̃ae korena kiena yaru tai poli, osum̃a ga sanene, ko m̃ena monar ositom̃alia ovisave pogos nãpa Kristo vio ko, ko na monar oimi sane kiena yaru na yum̃ae korenaena tai narui, vena kilaen kiena yum̃aena make ga. ²³ Naga nene komin Kristo pul plan ita e pupia suri tai, sane kana kuruta, vena ita teve kiena, ana monar tevisu kilale ga narui sane mesmesun ga nãpa teyum̃ae koren ga vania, po pon re teyum̃ae korena van yaru tãpena poli, pona tesike vatanon sitomena kiena yaru tãpena nãpa temiyum̃ae ke pania.

²⁴ Erau lala naga ke nene narui, yo nãpa osike ea pogos nãpa pe okilia re Ntewa poli wa, yo ke nanene narui monar osum̃a ga ea, ana nagane omlelaga rui, yoko Ntewa sum̃a ga amio ko e nene silaga.

Naviunena e lepas kiena la nãpa pe atalopa re poli wa, amio letano lala

²⁵ Pogaga, nesape nela narin visena tai van amiu e lepas kiena la nãpa pe atalopa re poli wa. Visena nena, tãpatete nevisave nanene navisaluaena tai kiena Sũpe nãpa pisa pan inu, ana visena nene naga sane kiau sitomena ga tai. Ana kam na akilia rui sane Sũpe naga po pãpisi pan inu, naga mla manmaruaena lala pan inu nãpa yoko amiu akilia awasine ruru la, ana

popon asitom urmi e kiau visena nini narui. ²⁶ Nagane, tesike e pog viowa tai naña tesuñã tepisu ke suri m̃arera la naña tepane la, ana popon nevisa si visena naña nepisa metava rui, naña nesape popon teva ruru ita tesuñã ga e malena naña tesike pae e rui. ²⁷ Sanene, visae ko yaru tai naña otalopa rui omio sira tai, popon osu ruru ga osuñã sanene, ve ositom re ovisave oligan lua naga. Visae ko pe opure re sira tai poli wa, ko m̃ena ga osuñã ga sa ga nene, pe ositom re osape otalopa omio tai poli.

²⁸ Ana visae ositom sane peraga, sinoñan manene osape oure sira tai, pe nepisa re nesape piowa poli, a visae sira m̃ee tai talopa amio yaru tai, naga m̃ena nene pe sa re kiena mlamulena viowa tai poli, nanene na pogaga nene. Ana la naña sinelan talopaena, la monar avisu kilale sane yoko tařatete kiela malena memea, yoko avane pog m̃arera la ve moki vařisi e yomarava nini, a visae otaveve kiau visena, naña ve otalopa re, yoko nekekara vařisi.

²⁹ Erau lala, nepisa ke sanene komin naña narin pog plas ga sike ga wa vano-o tol pogos naña sa Suře wasuře si vitomi, a pe yaru la moki re poli na kilaen kiena yuñãena. Ve sanene popon manene visae la naña ařure wola la rui, akila sa naña pe atalopa re poli wa, ana akilia akila yuñãena lala kiena Suře ve moki. ³⁰ A la m̃ena ga naña asuñã atagin ke suri tai, popon sinela řesan suri naña atagin ke ne, a la naña amloge ke pon kekarena lala na yomarava, popon ve asitom̃al re sina. La m̃ena

naþa amiyuñæen ke kilavaru, popon akila sa naþa limala korena ga. ³¹ La naþa akila yuñæena taþena lala na yomarava nini, popon akila sane pe kiela sur re tai sike e poli, komin yomarava nini amio kiena suri make ga naþa sike ea sun ke naþa yoko va kokovio narui.

³² Nepisa ke visena la nene pan amiu komin nesitom amiu paþisi, pe sineun re naþa silaga aligan lue ga kiamiu sitomena se suri la ve moki poli. Yaru naþa pe wona re poli, naga kilia sitom urmi e yuñæena kiena Suþe silaga, sape yoko naga kila ve sanape naþa yoko Suþe kekarania, ³³ ana yaru naþa sike amio wona, naga suñã sitom manene suri na yomarava la paþisi, ana kila ve sanape naþa yoko wona na sira kekarania, ³⁴ a yoko kilia kila ñena sa naþa kiena sitomena la ve ve lua. A sira ñee naþa pe wona re poli, naga ñena ga kiena sitomena ñarera ruru po vena kilaen yuñæena kiena Suþe, a kiena yalena amio kiena yuñæena kilia ve wa ruru lue ga. Ana sira naþa wona suñã ga, kiena sitomena monar su ga e yuñæena na yomarava nini, sane monar kila suri la naþa wona na yermñene loge wonia. ³⁵ Kiau visena la nene, pe sineun re visaluþar amiuena e suri tai poli, naþa sinemiun asape akila, ana nepisa kiau visena kilali naþa iila kiamiu malena. Sineun ga nesape suri na suñare punu ga kirir ruru wo, a sineun nesape ita li nalelagaena lala ve tekirakirai re, ana tekira tevisu ga kieta Suþe naga taaga.

³⁶ Ita laþasia akila naþa akilawo kiela sira tai,

ana asitom asape popon asutowe laa sane wa, pe asitom re talopaena poli komin naña sinelan kilaen yumãena kiena Suþe. Ana visae lala tai visu sane sitom manene la sira nene naña akilawoia, sa naña sitom manene vano-o visu sane yoko uarar þele si naga, naga popon akila ga lalua atalopa narui. Nanene naga pogaga ne, naga pe mlamulena viowa re tai nene poli þisa. ³⁷ Ana visae tai kila ruru sitomena m̃arera naña m̃arera sape naga sinenan vena naga amio sira nene naña akilawoia vena ve kiena, lalua asumã sanene sumo wa, a visae naga visu kilale sane naga kilia kawean ruruia, nanene naga kila po paþisi visae ve talopa re ga amio wona nene rui. ³⁸ Sanene, naga naña talopa mare ga amio naga naña akilawoia asape ve kiena, naga kila suri wo tanea tai paþisi, a naga naña sumã ga, pe talopa re amio naña apisawo poli, naga kila sur tai naña po manene laa sane. ³⁹ E lepas kiena la naña atalopa rui, monar ve aure matan la re sina. Sira naña talopa naga monar su ruru ga amio wona na yermene naña wona nene mali ke ga wa. Ana visae yaru nene mare, sira nena kilia talopa sina, akilia talopa amio yaru tai naña naga sinenania, ana monar ure ga naña naga m̃ena mlelaga e Suþe. ⁴⁰ Sanena naña nepisa ke ne, naga kilia talopa, ana nepisu sane yoko wo laa vania, pona kiena kekarena keviu laa sane, visae naga ve talopa re sina. Nanene inu ga kiau sitomena, ana nesitom nesape Ninuna Ntewa ga mla sitomena marua la nene pan inu, ana popon asitomruruia.

8

Sanapen tata la naña aňemaria pe na kilaen lotena van nono lala?

¹ Nagane sineun visataňeen kiamiu naviunena e lepas na tata la naña yar la naña pe amlelaga re poli akuřařain la ke pan kiela nono lala. Ana amiu asuňa apiun ke asape popon ita li nalelagaena la takan tata la nene, pona peraga?

Pogaga, yoko kiau navisataňeena visayu sur ve lua, řelaga na kiliaena, a řelaga na sinesiena. E lepas na kiliaena, yar la mok liu naña la asape akilia ruru navisataňeena na kiamiu naviunena nene, a akilia avilaven towe mąaga naña asitom asape akilia suria. Pelaga na kiliaena kilia kila yaru ligan kiena sitomena va metava, ana řelaga na sinesiena pe sa re nene poli, suňa miila ruru ke ga malena kiena yaru. ² Yaru naña sitom manene ke sape naga tol ruru řelaga na kiliaena, naga pe kilia ruru re Ntewa poli wa sane popon kilia naga. ³ Ana yaru naña tol ruru řelaga na sinesiena, naga ke narui naña Ntewa pisu kilale ruru naga.

⁴ Pogaga, nane kiau visena lua si ne nanene narui, e lepas na tata la naña akuřařain pa nono lala. Suri na sumo pisa sanini, sape akilia asape sane nono la nene ape totou ga, a pe ape totou na sur lelaga re nena tai poli. A sur na lua naga sanini, sane kieta Ntewa naga taaga nena naña pe lelaga sike na. ⁵ Yar la asuňa apisayu ke kiela ntewa tařena lala pona kiela suře tařena lala naña asape asike ma e peni pona e yomarava nini, a apisayula ke sa ga la yo pulen la ga asuňa

ga, ⁶ ana e ita, tekilia ruru tesape Ntewa na taaga ga suña ga. Naga nane Ata Ntewa, naña naga pe purpes nen sur make ga, naña ita tepe kiena. A Supe taaga ga naña sike na, nane Yesu Kristo, naña naga sii make suria, a naña temal ke mēna ga e naga.

⁷ Naga nene kiliaena napo naña ita li nalelagaena la moki tetol rui, ana sur tai piowa ga, ita lañasa pe tekilia ruru re sur la nene poli wa. La nene, nanua sumo la mēna asuña amlotun nono lala, ana pimi tol pñane, mārera pañisi naña avisu kilalea sane naga nene pe sur na visokanen ga. Sanene na pogos naña yaru la akukin tata la naña akila kuñapaena ea pa nono lala, tekilia takania sa ga pe pe sur re tai poli, ana ita tañena la nene, pogos naña akania, akan amio sitomena naña asape tata nene naga kana nono lala, a siraunia yepela pñilinia, amloge sane akila sur tai naña pe mesmes re poli e marana Ntewa.

⁸ Ana monar tekilia sane kinanena, naga pe pe sur re tai naña kilia kila Ntewa visu ita sane topo pona tepiowa. Visae ve takan re tata nene, pe kana kinas re nane topo e kiena navisuena poli, pona visae takania, pe kana kinas re nane tepiowa poli.

⁹ Sike ga e ita visae sinetan takania pona yepeta mavin kanena, ana pe pon re tekila sur tai naña nalelagaena tañena sitom sape pe mesmesun re kilaen poli. Pona ita tekilia tekila sur nena woga ga yo, ana pe pon re naga visu naña tekila poli, ana kila kare kiena sitomena.

¹⁰ Sane e lepas na tata la nene, pona e kionña sitomena, okilia okan woga yo, ana okilia okila

pe pe sur re tai poli. Ana visae pogos tai osike omio yar lala loyuma e kiela yuma na lotunen nono lala, ana ala tata van ko ana okan omio la, yoko ve sanape naŋa visae nalelagaena taŋena tai visu ko? Pona naga tai naŋa pisaar pisape naga mlon ke tata la nene yo, ana pogos naŋa naga pisu ke naŋa okania, yoko naga visave "Suwala, yar nene naga pe yar na sumare tai naŋa kilia ruru suria, ana naga suma kan ke ga tata la nene. Sanape, popon in mēna ga nakania." Naga pisa sanene narui, ana naga mēna ga kania, ana siraunia yoko kilia loge viowagania vaŋisi komin naŋa sitom sape naga kila pupia mlamulen viowa tai.

¹¹ Naga nene kana kinasa sane ko na osuma otaveve ke kioma kiliaena napo, opisu kilale sane okilia okila sur nene. Ana monar ositom ovisave yar taŋena nene, naŋa naga pe womla tai naŋa Kristo mare vena tamalia naga, naga maraun kilaen paŋisi. Sanene, visae naga visu naŋa okila pogos tai, yoko kilia kila naŋa okila kare nena kiena naviawaena. ¹² Visae ve sanene, yoko Ntewa visu ko sane ko ke narui okila mlamulena viowa pa womla nene, komin naŋa okila naga kila sur tai naŋa e kiena sitomena piowagan kilaena. Naga nene piowa ga, sane okila ke ga mlamulena piowa pan Kristo.

¹³ Komin sur nene, in na nekila kiau sitomena tai, sane visae kiau ŋelaga na kanen tata nene naga pe sur tai naŋa kila kare naviawaena kiena wolai nene, yoko neligan ga narui. Ve netol re sina, komin naŋa yepmavin naŋa in ke narui nekila wolai nene loru.

9

Pol pisayu kiena ðelaga na yuũaena

¹ Erau lala, sineun nevisa van amiu nevisave in na pe nesu re vatanon e sitomena kiena yar taþena poli, ana nemiyuũae taveve ke ga ya naþa nekilia nesape mesmesun nakilaena. In na nepe nalogena tai naþa nepisu kieta Suþe Yesu e kilamarau, a amiu ke narui naþa sane mras nen kiena yuũaena naþa nemiyuũaenia.

² Nekilia nesape yar la þasia yepela mavin visu kilale inena sane nepe nalogena tai, ana amiu na pe sa re nene poli. Nagane kiamiu malena su ruru sike amio Suþe rui, a sur nene kila apisu kilale asape nemiyuũae ke pan amiu sane nepe kiena nalogena lelaga tai.

³ Ana e la naþa sinelan liþere inena sane asape nekila ke piowa sanene sanene, kiau navisataũaena la suũa ga. ⁴ Nekilia sane asape asuũa apisuar imimi pano-o sinela mare, ana sanape? Apisuarũa taþena la nanua sumo ne, ana pe apis re sanene poli, ana pogos naþa nepimi, apisa sur taþena narui. Pona asitom asape visae ve mekinana re pona ve momun re ana mekilia memal ga ve sanene vena kilaen yuũaena pula?

⁵ A apisayu imimi laþas naþa atalopa rui, apiun asape komin ya ne wolaũaena la apim asuũa ataveve imimi? Ana ane sape nene naga piowa ga? Nalogena taþena la ne apim þesa, amio wenla Suþe lala, amio Keþas, pogos naþa amiyalin ke yuũaena sanene, wola na sira lala

asumã ataveve la, ana e poglis nene, yar la nene pe apisa re sur tai e lepas nene poli.

⁶ Ana asape avisaluþar imimi ke sina ga ve meyuñãen re kilavaru vena ulen kiamimi suri lala. Visae imimi lua Panaþas ve meyuñãe re ga woga ga rui, ana komin ya ne apisa ke ga sanene pan imimi lua Panaþas, ana pe apisa re pan taþena la poli?

⁷ Asitomyuli yaru na mara lala na purvanua taþena tai. Pogos naþa apanon mara, ana ane pul ke kiela sur lala? La ga apulia, pona kiela þarin suþe naga pisuvevea? A asitomyuli la naþa amapla kinanena e lokove. Visae akinana e lokove nene, taþatete yar tai vis van la vanonia. A sanapen mñena yar naþa pagan ke surmal lala? Pona naga pe kanli re nena kala tata ne tai poli yo?

⁸ Nepisa sur la nene vena kila amiu avisu kilale sa naþa visae yar tai kila yuñãena tai, popon yar la naþa naga miyuñãe kiela monar avisuar ruruia. A nepisa sanene, pe molue re ga e kiau sitomena poli, ana kieta navisaluaena wa pisayu mñena ga sanene. ⁹ Visena tai sike loyuñã e navisaluaena kiena Mosis rui, naþa pisa sanini, sape

Pogos naþa kiomã puluk tai sumã yaloro ke metava e kiomã mralaki sane kona vena vie plan kurusnela, ve oviar re gona, ana monar otamãan naga yaloro ea ana kinana lilue mñaga vano. *Naw 25:4*

Pogos naþa Ntewa pisa visena nene narui naga pe sumã sitoñal re sur mal la poli, ¹⁰ ana

naga sitomãl ita naþa temiyumãe, sape la naþa temiyumãe kiela, monar avisuar ruru ita. Yaru naþa miyumãe e porotano, mesmesun naþa naga sitom visave pogos tai yoko kan ya naþa naga mapila, a yar naþa va lokove war kinanena vitomi, mesmesun naþa naga m̃ena sitom visave yoko atamãn ve tokaki vania. ¹¹ Ana e lepas na kiamimi yumãena pun amiu, memapila mras wo la mok liu rui e kiamiu malena, ana popon vena amiu akekaran naþa avisuar imimi a akian navisa ruruena laþas naþa Ntewa mligan e limamiu van imimi. ¹² Amiu asumã amiila ke yar taþena laþasa sanene rui, ana popon akekaran manene laa sane nakilaen wo van imimi naþa imimi mekila þesan po pan amiu sumo rui.

Ee, popon akila sanene van imimi, ana tol nagane pe mepisa re nena pan amiu mesape monar akila. Memaraun mesape sa þisi mevisawal sanene þisa, yoko asitom viowa e imimi narui, sa þisi kilawo lawe mrapa na Lologena Wo imi pun amiu. Kila narui mepis re si poli, a visae meloge viowagan naþa pe apisuar imimi re poli, pogaga.

¹³ Ana popon asitomyuli m̃ena ga sane e Yumã Wa m̃ana Ntewa, la naþa amiyumãe ke loyumã ea amio li na kuþaþaena lala, asumã akan ke sur la nene, a asumã amal ke e sur la naþa yar la amla ke sane kiela nalaena pa Ntewa. ¹⁴ A Suþe pisawal m̃ena ga sa ke nene e lepas kiena ne kiena yeririna la naþa asumã amlologon ke Lologena Wo. La m̃ena ga, mesmesun naþa

akilia amal e nalaena la naña yaru la ne amloge ke Lologena Wo nene asumã ala van la.

¹⁵ Pogaga, in na yar la ne tai ne sanene, ana siar nanua sumo pimi pe nepisali re nesape yar la monar ala sur tai sanene van inu poli, pona monar akila ve sanape na van inu. A nesumã nepisakol ke ga sur la ne e mñaki nini, pe naga re ga naña nesape neviun sur tai tan amiu poli. Pe sineun re nesape asiar naña ala sur van inu poli, ana añarwar amiu asape amiu ke narui apagan inu, ana sineun nesape in na nekilia nesumã nowarwar inun nesape Ntewa ga sumã pisuar inu silaga. Pogos naña nekilia nesape kiau malena sike ga e limana, nesumã nemloge po pañisi, a visae ve naga re naña sumã visuar inu, pona yoko neloge sane popon sa nemarpan ga rui. ¹⁶ Nesape noñarwar inun naña naga pisuar inu sanene pogos naña nemlologon ke kiena Lologena Wo, ana e lepas na pun inu, lelaga pañisi pe sur re tai naña nekilia noñarwar inun poli. Tařatete nevisirlua si kiau kia va metava, nesape in ke narui nepe yar na lologonen Lologena Wo, vanon Ntewa ke narui naga mligan e lumãu, ana nepisu sane monar nekila ga narui. Visae pogos tai nourenia ve nekila re sina, yoko viowa van inu vañisi. ¹⁷ Visae nekila ke yumãena nene e ga e kiau sitomena tai, inu ga nesape popon nekila, vena Ntewa kekarania, pona yoko kilia la nalaena tai van inu komin yo, ana pe sa re nene poli. Pe inu re naña nesitom nesape nekila poli, ana Ntewa ga pisawalia, mligan e lumãu, ana monar

nelogearia, nekila ga ve sanene narui. ¹⁸ Ana sanene, nesitom ðele nesape nela nalaena tai vanonia, ana naga nene pogaga, komin naða Ntewa suña kila ke sur taþena tai sane pul inu e sur wo tai rui. Sur nena, naga pupia nalogewoena nene naða netolia, pogos naða nesuña nemlologon ke lologena wo pa yar lala, naða nekila korenan ga sanene pan la. Pona nekilia nevisa van la nevisave ala sur van inu vanonia, pona avisuar ruru inu e pogos naða nemiyuñae ke sanene, ana pe sineun re nene poli, sineun nesape akilia atol ga sa ga nene, pe suri tai suwo la re poli.

Pol naga miyuñae korena ga pa yaru lala sane nalologena wo tai kiena ne Ntewa

¹⁹ Sitomena ne nanene sike e inu, a nesuña nemiyuñae ke e þelaga tai naða yoko nevisa meraravan van amiu nagane.

Sane, inu na pe nemiyuñae kiena yar re tai poli, a pe yar re tai naða pe yer kawan inu poli, ana inu na nekila inu nepimi sane yar na yuñae korenena van yar taþena lala, vena kila sane nekilia netaulu la ve moki aimi alelaga.

²⁰ E lepas kiena ne le Yu lala, nesuña nekila inu nepim nepe yere Yu nena napo, vena kila sane nekilia noure laþasia aimi.

E lepas kiena ne la naða pe ape Yu re poli, ana ataveve ke navisaluaena kiena Mosis, nesuña nekila inu nepim sane yar tai naða nataveveen mēna ga navisaluaena nene. Pe nepisu re sane nesike vatanon navisaluaena nene poli, ana

nekekaran naþa nevatanonia ve sanene, vena tauluen la nene naþa sinelan suen vatanonia.

²¹ E lepas kiena taþena la naþa pe ape Yu re poli, naþa pe ataveve re navisaluaena kiena Mosis poli, nesuþa nekila inu neve taaga nemio la, komin nesape netaulu la mþena ga. Pe nepisa re nesape nesuþa nekilaro navisaluaena marua kiena ne Ntewa poli, peraga, ana pogos naþa nesike nemio la, nesuþa netaveve ke navisaluaena viu kiena Kristo vena kilia kila la alual malena.

²² E lepas kiena ne la naþa nepisu sane pe asuþal ruru re mþarera poli, pe nepis mþarera re pan la poli, ana nekila ke sa naþa in mþena nemio la, nesuþa nemiila la, vena pona netaulu la yo.

Sanene, inu na nesuþa netaveve ke mrapa make ga nakilaen suri make ga naþa nekilia nekila van yaru make ga, vena kilaen sanene vano yoko nekilia netamalia laþasa aimi alelaga e Yesu.

²³ Nekila sanene, pe nekila re ga pan inu poli, pona vanon suri taþena tai, ana nekila vanon ga naþa sineun nesape Lologena Wo monar war mrasa e malena kiena yaru lala, a pogos naþa nepisu navisa ruruena naþa Lologena Wo kila pan la, nemloge po na po.

²⁴ Asitomyuli pogos naþa yaru na kiririena lala akiriri ke veraga. E pogos nene, la make ga monar akilali naþa akiriri koskos veraga avano, ana la ve via aim þes vamon la, a kilia taulu taþena lala? Yoko ve taaga kilia koven make laþasa, kiriri vano yuve la, la kiena nalaena vanonia. Ve sanene narui, kam make ga

monar aṃareran yuṃaena kiena Suṓe, monar aṃareran akiriri avano vena ala kiamiu nalaena.

²⁵ Yar na kirakiraena la asuṃa aṓion ruru la silaga, a asuṃa apalia ke suri make ga la naṓa kilia kila tasnela ve ṃarera ruru re. Asuṃa akila ke sanene komin kiela sitomena lala ṃareran sape monar atauluia, atol nalaena. Ana pogos natelannen meme e yaru na kirakiraena la nene, yam plas ga meme la nene pioyowa sina, ana meme naṓa popon toṓion naṓa atelan e ita, naga yoko sike sike nena.

²⁶ Sanene, in na nekila ke sanene narui e yuṃaena kiena Suṓe naṓa nekila ke ne. Pe nekiriri koren kar re ga poli, a pe nekirakirai re ga sanene poli, ²⁷ ana nesuṃa nakawean inu, nesuṃa nepisuar ruru tasneu silaga, komin naṓa pe pon re nesuṃa nelologo ruru van yaru lala, nesape la sanene, sanene, ana siraunia, in ke narui nekila pal mrapa, pona pe netorokin re naṓa nekila make ruru kiririena naṓa nekiriri ke ea.

10

La naṓa asitom asape la amesmesu rui, akilia akila pal mrapa, sa naṓa apua kana le Yu la akila sumo rui

¹ Erau lala, popon tesitomyuli ya naṓa kata apua la akila. Naga nene e pogos naṓa yermarua Mosis sumon la amolue gar Isip, amio naga ataveve lul nene naṓa suṃa sumon la apa akusro pupia sive nene naṓa mliṓere pan la. ² Aṃal pogos ṃarera laa nene, ana Mosis ṓere la apa aṓarpoyo ea, ana apim sane ape kiena yeririna

kemua lelaga. ³ Kas moki asumã amialoro ke e yokorena, la make ga akan kinanena nene naña Ntewa kian pan la, ⁴ a pogos naña moto kar la, Ntewa kila wii kate e pulus nen kilavaru nene vena amunia. E poglis nene, sane Kristo ga sike amio la, sumã pisuar ruru la e sur make ga.

⁵ Ntewa kila mña po pan la sanene pano-o, ana yepela mavin sumãlen mñarera se ea. Apilon mäsila pania, ana naga pe tamãan la re apa loyumã e yo naña naga pisaar pan la poli, kila naña asumã amarmare tetai kar ga e yomema.

⁶ Ana ita nagane, pe pon re teve ãarmãrera ve sa repita la nene poli, ana visae tesitom ruru e ya naña pimi paemen la, kilia vian ita ea.

⁷ Visae ve sanene, monar ve teligan re sur tañena sumon Ntewa e kieta malena, sane nono tai naña telotunia, sa naña repita la nene akila. Visena tai naña pisayu kiela ãelaga e poglis nene, pisape

“La pe asitom re si sur tañena poli, sinelan ga kilaen ãaãagena, amun wii marala tetelivi, a aãure mña sira lala e wolena lala, naga ga nene.”

Nau 32:6

⁸ La asitom asape malena wo ne nanene narui, ana ve sineta ãesan re legiena nene naña Ntewa kila lomãara viowa la apim akar yermene lala amio sira lala naña akila lau, ana e legiena taaga ga nene la manu lualima yam lua pa telu [23,000] amare veraga e legiena taaga, sane kiela nakoena mñarera tai. Visae ve sanene monar tevisuar ruruia, pe pon re ita laãasa ava kar ga sanene poli. ⁹ Yar naña pilave, kila mlamulena viowa sanene, a naga sitom sape pogaga ne, ana

suña miyur kare Suře pařisi. Yoko Suře kilia kila sur tai vania, yoko yar nene ilania, lomara iminia sane yar na sumo la nene.

¹⁰ A pe pon re tevismumun Ntewa poli, sane la nađa asuňa akila nanua sumo e pogos kiena kata apua lala. E poglis nene, Ntewa pite-talia navisi tai na visaaren marena pimi pula, mēmoñar la.

¹¹ Tepisu nađa la asuňa akila ke mlamulena viowa sanene, ana tepisu nađa nakoarena pimi mālavin la ke sanene, ana pe suri tai naweřege itaena. La asirilua kana suniena nena nakonua konua rui, ana tekilia tesitomyu si suri nene naganene, e legiena maro la ne tesike e ne. ¹² Sanene, visae yar tai visuveve si kiena malena naga taaga, a sitom sape naga suňa suňalu ruru ke mārera rui, popon naga visuar ruruia, komin viowagan nađa visae naga kila si viowa pogos tai, ana loru.

¹³ Apisu nakilaliena la imi, ana ve sinemiu kurkur manene re. Pe kam re ga apane ke natađaliena la nene poli, ana asuňa aňalivi ke e malena kiena ne yaru make ga. Ana akilia awasine Ntewa, komin nađa yoko naga tađatete kila ko ovane natađaliena nađa ko pe otorokin re otaulu poli, ana pogos nađa natađaliena imi kilali ko, yoko naga vian kon kioňa mrapa naňareraena nađa nasuwoen natađaliena, vano-o oure matan naňareraena na tađaliena nene.

¹⁴ Kiau erau wo lala, monar ve ava re nena lavisin řelaga nađa yar la asuňa amlotun ke nono na visokanena lala. ¹⁵ Nekilia nesape kam

na yar sur la naña akilia suria, ana pogos naña nepisaar mesmesun nena pan amiu sanene, nemlelaga nesape kam na amninu kilale ya naña nesuñña nepisa ke ne. ¹⁶ Nepisa visena la nene komin naña pogos na ova oyakol amio yar la naña asuñña amlotun ke nono tai, sa ga naña ko ñena omlotun ke nono nene narui. Naga nene maran taaga amio ita la naña temlelaga ke e Kristo. E pogos na ñañoagena wa, temlenin namunena wa, temlavia, a na nene sa naña ita tepisawal tesape tesikol ita e ñegas kiena yar la naña kana kuruta mlau komin la. Ana siraunia, takawero kilaparavi wa, temlavia, a na nene sa naña ita temio la naña akila kare tasnena naña tamalele metava e lak torovia.

¹⁷ Nanene lelaga pan ita punu ga naña tesuñña tepim lele taaga e ñañoagena wa nene, komin naña tepim sane ñegas taaga, a takan pae ga kilaparavi taaga nene.

¹⁸ A sa ke ñena ga nene pa le Israel lala, pogos naña amemomñar suri na kuñañaena lala. Lañasa pe akila re kuñañaena poli, ana akekaran kanen tata na kuñañaena nene naña yaru taña ga la akila, ana kila sa naña ape ñegas taaga naña akila lotena na sanene pan Ntewa.

¹⁹ Pogaga, visena la nene kana kinas na ya? Nesuñña nepisayu ke nono lala amio nakuñañaena la nene, ana e kiau sitomena kana kinas pe nepisa re nesape sur la nene na lelaga poli, pona apowo liu. ²⁰ Pe sa re nena nene poli, ana popon nekila meraravan van amiu, nesape

la naŕa akila ke lotena kar la ne sanene, pe amlelaga re e Kristo poli, a kuŕaŕaena la naŕa asuŕa akila ke ne, pe asuŕa akila re pa Ntewa lelaga poli, ana asuŕa akila ke ga pa yermare lala. Sanene, pe pon re ava lavisin la naŕa asuŕa akila ke poli, komin pe sineun re nesape asikol amiu amio yermare la poli. ²¹ Ko naŕa ototano ke e lele na kinanena kiena Suŕe, osuŕa omun ke e mŕana piala wa, a osuŕa okan ke kana kinanena wa, taŕatete okilia ova ototano e lelen kinanena kiena yermare lala vena omun kiela namunena a okan kiela kinanena. ²² Yar na kila sanene naga suŕa miyur ke Suŕe, kilia kila Suŕe vielue vaŕisi, sinena karia. A pona yar nene sitom ke sape visae Suŕe sinena kar sanene, pe pe sur re tai poli, komin naga mŕarera manene taulu Suŕe? Pe nesitom re nena sanene poli.

Li nalelagaena lala monar ve akila re sur naŕa kilia kila li nalelagaena taŕena lala aloge viowa

²³ Visena tai suŕa ga, naŕa yar la mokliu apisa apisape, yaru kilia kila ga ya naŕa naga sinenan sape kila. Pona visena nene pe lelaga yo, ana sur laŕasa sike na naŕa nekilia nekila, ana yepmavin ga kilaena, komin e kiau navisuena, la pe asuŕa amiila inu re e kiau malena poli, a pe asuŕa amiila re malena kiena yar la naŕa asike lavisin inu poli. ²⁴ Nepisa sanene komin naŕa pe pon re yar tai suŕa sitoŕal ga naga taaga poli, ana monar sitoŕal mŕena yeririna la naŕa naga sike lavisin la.

²⁵ Pogaga, nagane yoko nevisa sur laḡasa e lepas na tata na sur mali lala naḡa akila kuḡaḡaena ea pan kiela nono na visokanena lala. Visae awar tata la nene imi, aligan su amio tata taḡena lala, vena awilwilin la, tekilia toulia takan woga ga. Nanene komin naḡa taḡatete tekilia tevisu kilale sane tata na ya la ne sanene, tesape tata ya naḡa akila kuḡaḡaena ea, pona tata ya naḡa pe akila re kuḡaḡaena e poli, ana ve tesitom manene re, ve teviun re, toul ga narui. ²⁶ Telavia, takania, komin naḡa sane visena tai pisa sanini sape yomarava nini,

*amio sur make ga naḡa sike ea, naga pe kiena ai?
Naga pe kiena kieta Suḡe. Yauena 24:1*

²⁷ A visae yaru tai naḡa pe mlelaga re poli, vio ko vena ova okinana e mḡana yuḡa, pona omaraun vaena yo, osumḡa ositom ke osape pona awar kinanena laḡasa van ko naḡa akila pae lotena na kiela nono la e yo rui. Ana peraga, visae osumḡa ositom ke naḡa ovano, ova ga, a ve oviun re naviunena sanene, ola ga ya naḡa visae ala van ko. ²⁸ Ana sur ga tai, visae ova osike pae e naḡa rui, a nalelagaena taḡena tai teke ea, ana pona naga visa van ko sanini, visave Wolai, tata nene, italua monar telonia, komin nekilia rui nesape akila pae e rui pa kiela nono lala. Visae naga visa ve sanene van ko, ana sanene yoko ko mḡena ga ve okan re. ²⁹ Lelaga, e lepas na kioḡa sitomena, okekarana ga kanena, ana e lepas na womla taḡena nene naḡa pisa sur nene pan ko, viowa vania, ana pe pon re si otol poli, komin visae peraga, yoko okila sur tai naḡa kiena

sitomena pe mesmesun re nenaga ñisa.

Ana visae ko ga taaga, a pe yar tai pisawal re sur la sanene pan ko poli, okilia okila ya naña ko sinoñan osape okilia okila.

Nane kiau sitomena sanene e lepas nene. Nesitom nesape pe mesmesun re naña yaru tañena ga kilia ñareran inu visave monar nekila nene, pona ve nekila re nene. ³⁰ Visae kinanena ya, nevisu sane visae nelenwo sumo, yoko nekilia nakania woga ga. Pe pon re yaru tañena sinena karinun poli, naña nakan ke tata naña nepisa potena pa Ntewa vanon rui.

³¹ Pogaga, naga kana kinasa sanini, sane visae tekan suri tai, pona tomun sur tai, pona ya si naña tekilia tekila, ana monar tekila make ga e ñelaga tai na visirluaen kia kiena ne Ntewa. ³² Pe pon re akila sur naña kila kare sitomena kiena le Yu la poli, pona le Kris lala, pona kieta li nalelagaena tañena lañasa, ³³ ana popon amiu akilali sa naña in na nesuñña nekila ke pan la. E sur make ga naña nesuñña nekila, pe nekilali re ya naña yoko wo van inu poli, ana noñikeyon naña wo van la, vena kila sane pona lañasa akilia atol natamaliaena.

11

¹ Lelaga erau lala, sa naña nesuñña nekilali ke naña neyaloro nelilu lana Kristo, popon akilali ayaloro alilu lelen lau.

Pelaga wo kiena yeririna la pogos naña ava e suñare

² Erau lala, nemloge sane asuũa asitoũa ke yuũaena la naũa nekila pan amiu na wa, a asuũa atarar ruru ke ulla lala na yuũaena nene naũa nepian amiyunia. ³ Ana e sur la nene, tai sike ga wa naũa sineun nesape monar akilia ruruia, naũa pisayu yermene amio sira, naũa lalua kiela yuũaena pe maran taaga re poli. Sa naũa Ata Ntewa naga pe ullun Kristo, a Kristo naga pe ullun yaru, ana yermene naga pe ullun wona.

⁴ Ana taveve kieta ulla, visae yar tai lotu, pona visi e marana li nalelagaena lala, naga monar ve yan re karo na ullina e ullina. Visae naga yania, tevisu naga sane wowe tai naũa mninue ulla na vatanoena. ⁵ Ana sira lala na pe taũa. Visae sira tai lotu, pona visi e marana li nalelagaena lala, tepisu sane popon naga yenwo ullina e karo na ullina pona kulmrae tai. Visae ve yenwo re ullina sanene, naga mũana ga kila piowa, tepisu naga maran taaga visae akervan ullina ve ullun ga rui suũa se maran yaru lala. ⁶ Visae sira tai ve ullun, yepen mavin kaloen ullina sanene, popon avisa vania avisave popon naga kervan ullun, ana yoko kilia suũa ga na wa su loyuũa e suũana ana lotu. Ana yoko naga mawa vaũasi nakilaen sur nene, komin pe pon re sira la aweroro ullun ve plalas manene poli, pona akervan ullun ve ullun. A visae ve sur na kilaen sira mawa sanene, popon sira la akekan tararen kieta ulla na vatanoena, monar ayenwo ullun la sanene pogos naũa aim alotu e suũana.

⁷ Ana komin ya ne yermene lala la monar ve

ayenwo re ƣarila lala? Nanene komin Ntewa sike metava, a naga pe ƣar pa rui, ana naga kila yerm̃ene sane naga, pisirlua yerm̃ene kila naga pe ƣarun sira. Nane sa ke nene narui, yerm̃ene taƣatete kalo ƣarina, ana sira monar kalo ƣarina. ⁸ Tekilia sane yerm̃ene naga monar ve ƣarin sira sanene, komin Ntewa sii ƣesan yerm̃ene, siraunia sii sira molue kome lepas nen yerm̃ene, ana pe sii re yerm̃ene molue kome sira poli, ⁹ a naga sii sira vena iilaen yerm̃ene, pe sii re yerm̃ene poli vena iilaen sira. ¹⁰ Sanene, sira monar kalo ƣarina, vena kilaen sa naƣa naga patanon ke wona. Ana pogos naƣa naga kila sanene, navisi lala nae ma e peni apisuia, a kila naƣa apisu kilale sa naƣa sira kekaran vatanonen wona na yerm̃ene, a la m̃ena monar akekaran vatanonen kiela yerkaŋa keviu naƣa Ntewa. ¹¹ Lelaga naƣa sira monar vatanon yerm̃ene sanene, ana nanene kana kinasa sane pe sa re naƣa sane lalua pe atoroki re poli. Ita naƣa tesike loyuma e ƣegas nen kieta Suƣe, tekilia rui tesape sira na taƣatete suma naga taaga, a yerm̃ene taƣatete suma naga taaga, ana lalua monar asma ayuma lele taaga vena aiila la maran ve taaga. ¹² Nanua sumo la e nasiena, sira nasumo molue e tasnena yerm̃ene, ana siraun na nene, yeririna punu ga amolue akome tas nen sira tol nagane, ana tekilia tesape purƣes kemua lelaga, naƣa sur punu ga molue komea, naga Ntewa ga.

¹³ Pona laƣasa pe akekaran re kiau visena poli yo, naƣa nesape popon sira lotu monar

kalo þarina, ana asitomyu rurulia. E kiamiu navisuena, apisu sane sira naþa ve kalo re þarina, mesmesun ga naþa suñalu lotu va Ntewa? Peraga, e kieta þelaga na pe mesmes re poli. ¹⁴ E kieta malena na yomarava nini, merarava ruru pan ita rui sane pogos naþa yermene ligan vilþarina kapuru vim ve piyavi manenea, piowa pan paþisi. ¹⁵ Ana pogos naþa sira tañan vilþarina ve piyavi rurulia, po pan paþisi, a viluna na piyavi ne, Ntewa mla pania sane sur tai naþa miyowauia ruru yepena.

¹⁶ Ana sa naþa nepisa, li nalelagaena laþas asumã apisliu, pe akekaran re sitomena nene poli, sane sira naþa sinenan sape lotu monar kalo þarina. Pogaga, kiau visena sanini, nesape imimi li nalologena lala, memlologon ga sanene, pe mekekaran re þelaga taþena poli, a suñare kiena ne Ntewa taþena la ne asike ne, la mñena ga asape ve sa nenë.

Mrapa mesmesu nakilaen þaþagena wa

¹⁷ Sur si tai sike ga wa naþa sineun nela sitomena laþasa ea van amiu. A piowa ga, komin naþa naga pe pe sur re tai naþa nekilia nevisir plan amiun poli, ana naga pe sur tai naþa monar nevis van amiunia. Naga e lepas na pogos na suñare, naþa popon vena sur tai naiilaen kiamiu malena, ana akila sa naþa pimi pe purþes nen sur viowa si tai. ¹⁸ Nepisa sanene komin naþa nemloge rui sane pogos naþa amiu li nalelagaena lala apim lele taaga, pe ape taaga re poli, ana nalipereena sumã pa ke metava likan amiu. Visae visena la nene navisokanena ana

po, ana peraga, nepisu sane monar ve lelaga ga.
¹⁹ Ana pe nekilia re poli vanon ya ne sinemiun asape akila sanene? Pona yar tai sinenan sape yuve tai, tai sape yuve tai sanene yo? Pona sinoñan osape otauluia vena yoko yar la avisave ko ke narui ope lelaga, pona ko ke narui naña Ntewa sike amio ko?

²⁰ Ana e lepas na ãpaãgena wa, nemloge sane naga ñena nene asumã akila ke piowa ga. Pogos naña apim lele taaga vena kilaen ãpaãgena wa nene, pe akila re si sane nasitomwalena kieta Supe poli, ana akila ke ga sa naña kamiu kina-nena tañena lala. ²¹ Visae tai imi loge viso karia, yoko naga sumãlu kian limana la kilaparavi ve keviu, pona tañena mun kuruta na munena ve keviu, ana ve torokin re si lañasia! ²² Pona pe kamiu lelen viranen re kapi e poli yo, pisi na aim vena akinana loyuma e sumare? Pona asumã akila sanene komin naña asumã asitom korenan ke ga sumare kiena ne Ntewa, pona asumã asitom korenan ke ga erau na lelagaena tañena lala? Nemninue kare narui aña nevisa ya ne van amiu e sur nene, yoko nevisa ga nevisave pe nekekarana re nena poli.

²³ Mrapa mesmesu na kilaen kinanena wa, Supe ga pisa pan inu, ana siraunia in ke narui naña nemla lein pan amiu. Pa sanini, sa naña Supe Yesu, kiena yemalo maro nene, naña Sutas pielua naga ea, naga mla kilaparavi nene, ²⁴ ana mlen pisa potenania, kawerorovia, ana pisape “Tasneu ke nini narui, naña netamãnia vanon amiu. Ana monar asumã ala luen ga kilaparavi

sanini silaga, sa naþa sur na sitomãalinena tai.”

²⁵ Ana siraunia, pogos naþa akan pae, mla piala na kuruta, kila ke m̃ena sanene, pisa pan la, pisape “Piala nini, naga kau kuruta, naþa vena kilaen naviranarena viu naþa Ntewa kila amio yaru sumãlu. A pogos punu ga naþa ala piala nene, awis, monar asitomãal inu.”

²⁶ Erau lala, nane visena kiena Suþe e lepas nene, ana kila sane pogos naþa tela kilaparavi a tela piala sanene, tesumã tepisawal ke nasitomãalena na kiena marena, a monar tekila m̃a sanene vano tol pogos naþa naga imi m̃alivin ita sina.

²⁷ A nalaen kilaparavi kana Suþe nene amio m̃ana piala, naga pe sur tai naþa pe wa paþisi. Visae yar tai la e þelaga tai naþa ve mesmesu re, yaru nene kila piowa ga, þarnena kare tasnena Suþe amio kana kuruta, sa ga naþa naga ga m̃emom̃aria. ²⁸ Ana pogos nakilaen þaþagena wa sanene, monar ita make ga veve taaga tevisu ruru kieta malena lala, þisi na, tela kilaparavi amio kuruta nene. ²⁹ A pogos naþa telavia, monar tevisu kilale sane sur nene kana pupia kinasa sumã ga, naþa pisayu kieta Suþe naþa naga tañan kiena malena vanon ita. Ana visae yar tai lavia, ve sitom re urmi sane ita make ga tepe tas taaga e Kristo, naga la korenan ga, ana yoko naga visu sa naþa viowa manene laa vania. ³⁰ Sur nene sumã kila amiu ke rui, naþa amiu mokliu yepemiu la miaiai a amai, pano-o tol naþa kam laþasa amare. ³¹ Ana visae tevisu ruru kieta malena silaga, yoko Ntewa ve la re nakoena sanene van ita. ³² Ana ita naþa Ntewa

kila sanene pan ita, ve tela re sa naþa nakoarena tai, tela sa naþa navianena tai naþa Ntewa kila pan ita sape tekirava, vena la pulmas tai van ita e legiena maro, naþa yoko ve akoven ita re teva temio yar na yomarava taþena la naþa yoko ava e lele naloge viowaena.

³³ Erau wo lala, kiau visena ne na nene e lepas na kilaen þaþagena wa. Pogos naþa aimi lele taaga sanene, ana akila ga e þelaga napo. Ve yar tai kilali re naþa la þesania vena kan ve keviu, ana ava ruru amiu ga, pogos naþa amiu make ga asike lele taaga narui, ana akilia akila ga na wa. ³⁴ Yaru naþa viso karia sitom manene laa kinanena, popon naga sumã ga umã, kinana ruru kana. A monar ataveve ruru kiau visena e lepas nene, visae peraga, pogos naþa aimi lele taaga, ana yoko taþatete suri tai wo van amiu.

Sur taþena si laþasa sike e inu vena visawalen van amiu, ana yoko nevisayu la van amiu e pogos naþa neim nomãalivin amiu.

12

Mareraena la naþa Ninuna Wa kian ke sa naþa nalaena tai

¹ Wolai a vineu lala, pogaga, sineun visayuen m̃areraena la naþa Ninuna Wa kilia kian van ita li nalelagaena lala sane nalaena tai. E lepas nene, ve ave wowen re, ana sineun nesape monar akilia ruru toweli m̃aga. ² Ana popon asitom si wasuþe va e pogos naþa kam na pe amlelaga re poli wa. E poglis nene, nam̃areraena na ninuna taþena lala asumã amiyumãe ke e amiu,

aþure kare kiamiu sitomena la pa pe wowen ruru nenaga nalotunen nono kar la naþa pe apis re poli. ³ Nane ninuna sur ne la naþa akilia akila yaru vis viowa va Yesu, viuelin kiena kia, ana Ninuna Wa kiena ne Ntewa naga taþatete la visena la ne sanene. A ninuna la nene, taþatete akilia akila yaru visa visena wo lala, naþa sape Yesu naga pe Suþe kemua lelaga, ana yar naþa visa sanene, tekilia tesape Ninuna Wa miyuñae ke e kiena malena, mla visena na sanene pania.

⁴ Sanene, pogos naþa tepisu m̃areraena wo la naþa li nalelagaena la akilia amiyuñae amio, tekilia tevisave nane sane nalaena la naþa Ninuna Wa mla ke pan la. Mareraena mokliu nakilaen yuñae la sike ne, ana Ninuna ne Ntewa naga taaga pe purþesan make ga. ⁵ Sa ga naþa þelaga na yuñae la mokliu sike ga wa, ana kieta Suþe naga taaga pe þarun la make ga, ⁶ a sitomena wo na kilaen yuñae la sike ne, ana Ntewa ga naga taaga kila la apa ke metava pan ita make ga. ⁷ Sanene, e lepas nam̃areraena lala naþa Ninuna Wa kiania, li nalelagaena lala aþar peve taaga sane tai mla tai, tai mla tai, taveve ga ya naþa Ntewa pisu sape yoko iila manene þegas nen li nalelagaena lala.

⁸ Pan tai, Ninuna kian visena la naþa amanmarua paþisi.

Pan tai, kian navisukiliaena nowo lala.

⁹ Pan tai, kian pupia naviawaena, pan tai, kian naþa kilia kila ruru maiena.

¹⁰ Pan tai, kian naþa kilia yuñae kile lala.

Pan tai, kian navisawalena suri la naþa pimi ke ga wa.

Pan tai, kian naþa kilia mēne plan yermare lala.

Pan tai, kian naþa kilia vis e visena taþena lala.

Pan tai, kian naþa kilia vilon visena kiena la naþa apis ke e visena taþena lala.

¹¹ Nane nalaena la naþa Ninuna Wa naga taaga kilia ligan se malena kiena yaru, kian plan ke pan ita peve taaga taveve ga ya naþa naga sinenania.

¹² Li nalelagaena lala aþar nalaena taþena la ne sanene, sa naþa tasneta lala kiela kinakinas taþena lala mokliu. Kinakinas taþena la nene, amiyakolkol la asumña amiyumñae ruru ke veraga e tas taaga, a sa mēna ga nene loyumña e þegas kiena ne li na lelagaena lala, naþa la na sane kinakinas nen tasnena Kristo. ¹³ Pona ita tepe yere Yu pona tepe yere Krik, pona tepe yerkaawa pona tesumña temiyumñae korena kiena yerkaawa tai, ana Ninuna ne Ntewa naga þere ita make ga, kila akee ita vena teimi teve kinakinas nen tasnena ne Yesu komþasa, ana Ninuna ne nane naga taaga sike e kieta malena peve taaga.

¹⁴ Popon tesitom manene laa totou naþa tesumña tepisa ke ne, sane ita li na lelagaena lala ita na sane tasnena Kristo. Ana e lepas na tasneta lala, tekilia tesape kana kinakinas la mokliu.

¹⁵ Ana sanene, pe mesmesun re naþa kinakinas komþasa sane lana, mloge piowa, sumñalu pisape “Ke, in na nepe lana ga, in na pe nemiyumñae ruru re sane limana miyumñae poli, pona in na

pe pon re ga neve kinakinas nen tas komņas poli.” Ana peraga, lata pisa þele sanene, komin naga pe pupia kinakinas na tasneta komņas rui. ¹⁶ Ana pe mesmesun re naþa kiligata loge viowa poli, suñalu pisape “Ke, in na nepe kiligana ga, pe nepisu kilale re sur sa naþa kilamarana kila ke poli, pona in na pe netorokin re nesikol nemio tasnena poli yo.” Ana peraga, kiligata taþatete visa sanene, komin naþa naga kiena yumñaena napo e tasneta sike pa rui. ¹⁷ Naga nene komin naþa visae tasneta ve kilamarana ga, yoko taþatete teloge kilia suria, a visae tasneta ve kili-gana ga, taþatete telopon suria. ¹⁸ Ana e tasneta, Ntewa kila taveve kiena sitomena, mligan ruru kinakinas make ga su mesmesu ruruia sike nena e lelela lala, vena la veve taaga akila nena kiela yumñaena lala. ¹⁹ Visae kinakinas nen tasneta make ga maran ve taaga, yoko taþatete tevisu sane tas tai, ²⁰ ana kinakinas taþena la monar asikol la lele taaga vena kila sane tas nen yaru. ²¹ Kilamarata taþatete visa kare limata, visave “Ke, pe sineun ko re poli,” a þarita taþatete ñene lata, visave “Ke, pe nesitom ko re si poli.” ²² Pe sa re nena nene poli, ne! Kinakinas nen tasneta la þasia amalumlum paþisi, ana tekilia sane asumña akila ke pupia yumñaena. ²³ Kinakinas nen tasneta taþena laþasa, pe tesitom re tesape aña la apo sanape wa, ana tesumña tepisuar ruru la. Kinakinas nen tasneta taþena lala, pe sinetan re yar taþena visu poli, ana tesitom urmin naþa teyenwoia. ²⁴ A kinakinas nen tasneta taþena laþasa, la atorokin ga naþa yar la akilia avisuia,

ana ve teyenwo re. Sanene tepisu ke naña Ntewa mligan ruru make kinakinasnena mesmes ga, a mligan sitomena tai sike e ita sape pe sur korena naña kinakinas lañasa amalumlum, po pe akila re yuññaena keviu poli, ana tesitom urmi e la a tepisuar ruru la. ²⁵ A naga nene kila naña kinakinas make ga pe apeveyun la re poli, asu ruru ga, asuñña amiila la ke sina ga silaga. ²⁶ Visae kinakinas nen tasneta tai loge viowagan sur tai, kinakinas tañena make ga monar aloge viowa amio, a visae avisirlua kinakinas tañena tai akila wo vania, kinakinas make ga akilia aloge wo amio.

²⁷ Ana visena la nene la kala kinasa sanini, sane ita li nalelagaena lala, ita na sane tasnena Kristo, a ita peve taaga tepe kana kinakinas lala. ²⁸ A Ntewa mligan ita kinakinas na tasnena Kristo, ve nakilaen yuññaena lala na sumñare. Na sumo, Ntewa pisirplan lañasia ape nalologena, a nalua, lañasa ape navisawalena, a natelu, lañasia ape navianena, a suraunia, la mñena ga pñasia naña ave nakilaen kile lala, pona akila ruru maiena lala, pona avisuar yuññaena na sumñare, pona avis e visena tañena la, sanene. ²⁹ Ana pegas nen li na lelagaena lala, tepisu naña la make ga ape nalologena? Pona la punu ga ape navisawalena? Pona la make ga navianena? Pona la make ga ape nakilaen kile? Peraga, sa re nene poli. ³⁰ Pona la make ga nakilaruruen maiena? Pona la make ga akilia avis e visen tañena lala, pona avilon visena tañena lala? ³¹ Pe sa re nena nene poli, ana popon vena la make ga

akekaran naŕa atol pupia namãreraena ya naŕa Ninuna kilia kian van la.

A e m̃areraena la nene, tai suña ga naŕa monar imi ŕesa e kieta malena ita punu ga, naŕa po taulu make taŕena lala, naŕa sineun visayuen van amiu, nane ŕelaga na sinesiena.

13

Sinesiena

¹ Sinesiena, naga sur tai naŕa monar ve sur nasumo e kieta malena. Pona nekilia nevisi kome visena kiena yar taŕena la woga yo, pona nekilia nevisin visena kiena navisi la woga yo, nanene pogaga, ana visae ve sineu sii re yar lala, nekila ke sane kiau visena make ga sane ŕe tai naŕa aña miyelu wowe korena ga. ² Pona pupia m̃areraena sike e in yo vena visawalen visena kiena ne Ntewa, pona nekilia ruru sur moki naŕa yar taŕena la pe akilia re poli yo, pona kiau naviawaena keyiu manenea torokin nelotu ana sur la imi m̃alm̃alivi yo, sur la nene po manene paŕisi, ana visae ve sineu si re yaru lala, nepe sur korena ga. ³ Pona nekian kiau sur make ga pa yar la naŕa limala korena yo, pona nesum̃alu m̃arera m̃a pano-o asikap tasneu komin naŕa nepe yaru kiena Kristo, naga m̃ena nene po na po, ana visae ve sineu sii re yaru, nekila korenan ga.

⁴ Ana pupia sur nene, ŕelaga na sinesiena, naga sanape? Kiena sitomena piavi, a naga sinewo. Naga pielue re poli, naga pilave re poli, a naga pisirlua re si naga poli. ⁵ Kiena ŕelaga po,

naga puluvis re poli, naga sinena mimi koskos re poli, a naga tarar re sitomena viowa piavi poli. ⁶ Naga pe sinenan re sur viowa poli, ana naga kekaran ga sur wo. ⁷ Sinesiena naga suñalar lue ga, sinesiena naga lelaga lue ga, sinesiena naga wasine lue ga, a sinesiena naga taulu lue ga. ⁸ Sinesiena naga pe sinena mare re pogos tai poli.

Lelaga pañisi, namãreraena tañena lala, sane navisawalena lala, pona navisaen visena tañena lala, pona nakiliaena lala, yoko tañatete sike lue, ana nasinesiena ga naga su lue, naga tañatete ãisi pogos tai. ⁹ E kieta pogosia, asumã apisawal ke visena kiena ne Ntewa, a asumã apian ke nakiliaena la ne sanene, ana ya naña asumã akila ke nagane, naga kompãas nena ga, pe wetelu re nenaga ãisa. ¹⁰ Sur la nene ape nanagane ga, a e pogos naña Ntewa yoko kila sur make ga imi wo ruruia, sur tañena la nene yoko añisi, ana sinesiena yoko su lue.

¹¹ Naga maran taaga ga amio kieta malena. Pogos naña tepe sisi ke ga wa, kieta visena amio kieta sitomena mla ke ga ãelaga kiena sisi. Ana pogos naña tepe yerkaawa, pe tesa re si ninis poli, kieta ãelaga marua ruru nenaga. Ana kieta malena amio Ninuna Wa monar ve sa ãena ga nene. ¹² A maran taaga ãena ga e kupito naña tepisu ke marata ea. Pogos tai, visae kupito nene namname pona pe urmarua, ana tañatete si tekilia tevisu ruru marata ea. Ana e pogos naña Ntewa kila ruru make sur la imi wo, yoko tevisu kilale make suria, a yoko tevisu nena marana

Ntewa e kilamarata. A e m̃ena e lepas na kieta kiliaena, nagane tekilia vitokak ga, ana e pogos naña pimi ke ne, yoko Ntewa kila naña tekilia ruru naga, amio sur tañena make ga, maran ve taaga sa ke ga naña naga kilia ruru ita nanua sumo rui pimi tol nagane.

¹³ Sanene, sur tañena lala yoko p̃isi, ana sur la ve telu ga yoko kilia sulue, nane naviawaena, nawasineena, a sinesiena. A e sur la telu nene, naga naña keviu manenea, nane nepisa maron ne, naga sinesiena.

14

Pol pisayu sina m̃areraena lala kiena Ninuna Wa, sa naña avis kome visena tañena lala

¹ Ana komin sinesiena naga pe sur tai naña keviu manene sanene, monar aligan naga su p̃esia e kiamiu malena. A amio naga nene, monar aligan kiamiu sitomena se nam̃areraena la naña Ninuna Wa sum̃a kiania, akekaran naña atolia. A e m̃areraena la nene, tai naña po manenea, na naña yar visawal visena kiena ne Ntewa.

² Visae yar tai sum̃alu visawal visena kome visena tañena naña Ninuna Wa mla pania, pona wo van yo, ana sa naña pis ke ga pa Ntewa, naga pe sum̃a pisa re visena naña yar tañena la akilia aloge kilale poli. Pona naga sum̃a pisawal ke pupia visena la naña Ninuna Wa mla ke pan yo, ana visena la nene pe merarava re pan ita poli, tapolou ga, tañatete tetolia. ³ Ana visae yar tai visawal visena lala kiena ne Ntewa van ita, vis

van ita kome kieta visena, kiena visena wo la nene akilia akila ita tom̃arera, akilia avisir plan kieta sitomena, akilia akila luṗeluṗe losineta.

⁴ Sanene, yar naṗa pis ke kome visena taṗena naṗa Ninuna Wa mla pania, suṃa pagan ke sina ga naga taaga, ana yar naṗa pisawal ke visena kiena ne Ntewa naṗa yar la amloge kilalea, naga suṃa pagan ke suṃare make ga.

⁵ Pogaga, nekekarana naṗa visae avis kome visena taṗena la ne sanene, ana nepisu sane popon manene visae asuṃa avisawal ke visena kiena ne Ntewa van yar taṗena lala. Naga naṗa suṃa pisawal ke visena kiena ne Ntewa, kiena yuṃaena po manenea taulu yuṃaena kiena yar naṗa suṃa pis ke kome visena taṗena. Naga nene komin yar naṗa suṃa pis ke kome visena taṗena, kiena yuṃaena taṗatete kilia war mrasa e malena kiena yar taṗena. Kiena yuṃaena taṗatete vagan suṃare visae yar re tai naṗa suṃa vilon kiena visena vena yar taṗena lala akilia alogekilalea.

⁶ Erau lala, asitomiyulia visae inu, pogos naṗa nepim ke pun amiu nesuṃa nemlologo kome visena taṗena naṗa Ninuna Wa mla pan inu. Ana yoko taṗatete nena kiau visena la ne sanene kilia iila amiu. Ana pogos naṗa nepis kome visena naṗa akilia amloge kilalea, kila sane ya naṗa nemla pan amiu, sane sur viu tai naṗa Ntewa kipian inunia, pona kiliaena tai, pona navisawalena tai na visena kiena ne Ntewa, pona vianena tai, ana kilia iila ruru kiamiu malena.

⁷ Naga sane plaṗe amio kana laki naweena

naþa aþnea apolu, visae sur lua nene amenunu, ana pogos na wolena taþatete ologe yauena pona pialu yelu. ⁸ Ana visae suþe tai sinenan visave we þe na kumali, ana þe nene menununu, taþatete yelu ruru ve keviu, yoko yeririna la taþatete akilia aloge kilale avisave suþe mē þe na ya. ⁹ Ana sa ke mēna nene e kiamiu sumare gar e naþa. Visae yar tai sumā pisa ke visena lala kome visena taþena naþa yeririna la akilia re poli, yoko taþatete nena atol narin sur tai e ya naþa naga sinenan sape visa van la. Kiena visena yoko va kovio ga e yepesinas na mēke ne.

¹⁰ Sa naþa tekilia, visena mokliu sike e yomarava, a kiela visena lala kala kinas la sumā ga. ¹¹ Ana visae neva ko yo tai, neninue kiena visena, in na sane nepe wolawa ga e yo nena, a la mēna ga ave wolawa ga e inu. ¹² Ana visena nene, kana kinasa e amiu naþa asumā aþion ke asape māreraena lala kiena Ninuna Wa ayuþae likan amiu. A kana kinasa sanini, ve akila re naþa kam veve taaga asumā avisir plan amiu ga, ana monar awionlia vena amiu make ga asumā avisirlua sumare imi mārera ruruia. ¹³ Ana visae amiu yar tai kilia visi kome visena taþena tai sanene naþa Ninuna Wa mla pania, popon naga lenin va Ntewa vena Ntewa la māreraena vania vena vilon kiena visena la nene ava e kiamiu visena. ¹⁴ Nepisa sanene komin naþa visae nelotu kome visena taþena na sanene, nepisu sane nesumā nelotu ke ga e ninuu, ana loyuma e kiau sitomena nemninue ya naþa nesumā nepisa ke ne. ¹⁵ Visae ve sanene, yoko popon tekila ve sanape? E kiau navisuena, popon tekila e

lepas ga luwoka veraga. Visae nesuũa nelotu, pona nesuũa neyau, ana popon nekila e visena naũa molue kome ninuu, a popon mũena nekila e visena naũa molue kome kiau sitomena. ¹⁶ Visae peraga, pona osuũa olotu ga kome visena naũa molue kome ninuũa, osuũa ovisa potena va Ntewa komin sur laũaasa, ana yar taũaena naũa loge ŕele visena nene, yoko taũatete kilia, yoko taũatete visa “Sanene” e kiuũa leniena. ¹⁷ Pona osuũa om lotu ke sanene, opisa ke suri wo la moki yo, ana kiuũa lotena nene taũatete kilia iila sitomena kiena kiuũa erau ŕisa.

¹⁸ In na nekekara paũaisi naũa Ntewa mla namareraena nene pan inu vena nevisi kome visena taũaena naũa Ninuna Wa mlavia, nepisa potena pan paũaisi, a nepisu sane inu na nekila keviu paũaisi taulu amiu make ga. ¹⁹ Ana nesuũa nekila ke e pogos naũa inu ga taaga nesiau, pe nekila re e maran yaru la poli e pogos na suũare. E kiau navisuena, visae nevisa visena tai ve tokak ga kome visena tai naũa yar la akilia, naũa kilia vian kiela malena, naga nene po manene laa taulu naũa visae nekila visena la ve moki kome visena taũaena tai naũa la pe amloge kilia re poli.

²⁰ Erau lala, awis akilali naũa asitom ruru e sur la nene, kiamiu sitomena ve ve sa re ga ninis. Pe lelaga naũa e lepas na ŕelaga viowa lala, popon ave sa ga ninis, ve akilia make re sur ea. Ana e lepas na ŕelaga wo, kiamiu sitomena lala monar marua ruruia. ²¹ Visena tai sike e Siriena Marua, pisawal visena tai naũa Ntewa pisa sanini, sape *Yoko noure yar la naũa apimi e purvanua taũaena*

lala, naþa apisi kome visena taþena lala, neligan plan la avano vena avisawal kiau visena van kiau yeririna lala.

Ana kiau yeririna lala ape þarmarera paþisi, yoko taþatete ayagogon kiau visena la naþa wolawa la nene avisawal van la. Ais 28:11-12

²² E visena nene, nepisu naþa Ntewa pi-sawalia pisape naþareraena na visinen visena taþena lala naþa Ninuna Wa kiania, naga na ya? Mareraena nene pe pe kieta re poli ita la naþa temlelaga pa þisi rui, ana naiilaen la naþa pe amlelaga re poli wa. Pogos naþa aloge, avisu kilalea sane lelaga. Ana naþareraena navisawalen visen kiena ne Ntewa, naga kilia iila manene ita naþa temlelaga rui, naþa tekilia teloge ruru merarava wo. Ana naþareraena nene taþatete iila manene la naþa pe amlelaga re poli, komin yepela mavin yagogonen visena lala kiena ne Ntewa.

²³ Ana pogos naþa aimi lele taaga vena kilaen suþare sanene, pe pon re asuþa avis manene kome visena la naþa Ninuna Wa mla ke pan amiu poli. Visae pogos tai, yar tai naþa pe kilia ruru re sur nene poli yo, pona pe mlelaga re poli, visae naga imi loyuþa e kiamiu suþare, yoko naga visa ve sanape? Yoko naga monar sitom visave kam make ga ape wowe la. ²⁴ Ana visae imi loyuþa, visu naþa asuþa apisawal ke visena kiena ne Ntewa kome visena naþa amiu punu ga akilia, yoko naga yagogon ruru kiamiu visena wo lala, ana kilia yur kiena malena, kilia kila naga visu kilale kiena mlamulena viowa. ²⁵ A pogos

naña yagogon mña sanene vano-o, yoko naga loge visena kiena ne Ntewa tol kiena malena, va yupor e sur la naña naga þarwan sike e kiena sitomena, a yoko kila naga sinena ye si naga, kinai tano lotun Ntewa, visawal visave lelaga, Ntewa sike likan amiu.

Monar teyuñae e namareraena kiena Ninuna Wa e þelaga mesmesu

²⁶ Taveve visena la nene e lepas na namareraena lala naña Ninuna Wa kiania, yoko akila ve sanape e pogos na kiamiu lotena lala? Pogos naña aimi lele taaga, popon vena aliureure kana yuñae lala van amiu. Sanene, yar tai la yauena tai, yar tai la navianena tai, yar tai la sitomen viu tai naña Ntewa pisawal pania, yaru tai la visena tai e visena taþena tai naña Ninuna Wa kian pania, a taþena kilia vilon visena nene vena yeririna la make ga akilia kana kinasia, ana suri punu ga kilia vagan ruru malena kiena li nalelagaena la naña asike ne.

²⁷ Ana sa naña nepisa, visae e pogos nene, yar tai sinenan vis kome visena taþena naña Ninuna Wa kian pania, nanene pogaga. Visae ve lua pona ve telu naga pogaga mña ga, ana monar ve yuve re telu. A ve avis re veraga, ana ala pogos van la, tai sumo, siraunia taþena sanene. A tai mña ga, visae tai vis pae, yar taþena monar vilon kiena visena, vena la make ga akilia. ²⁸ A visae sinelan visen kome visena taþena sanene, ana visae pe tai re sumña ga naña tol namareraena na visawalen kinas nen visena la nene poli, yoko la ve avivis re si kome visena

taņena la ne sanene e maran yaru lala. Yaru na sanene, yoko topur ga, a kilia vivis ga kome visena taņena e ga e ninuna, naņa naga ga amio Ntewa lalua akilia aloge.

²⁹ E lepas kien la naņa apisawal ke visena kiena Ntewa, popon sane la ve lua pona ve telu ga avis. A pogos naņa avis pae, popon li nalelagaena taņena lala avisawal kiela sitomena ea. ³⁰ Visae tai suņa mlologo mņa, ana Ntewa kila sitomena viu tai imi van nalelagaena taņena naņa totano teke ne, naga naņa suņa pis ke ne monar ĩisi kone wa vena la pulmas van taņena nene. ³¹ Sanene, amiu punu ga akilia atol pulmas na visawalen visena kiena ne Ntewa, naņa tai visawal tai, ĩisi taņena visawal tai, sanene. Ana visena la nene yoko kilia visirlua sitomena kien yaru make ga, a la make ga akilia atol sur wo ea.

³² Visena wo tai sike ne, naņa torokin la naņa aņar ke naņareraena naņa Ninuna Wa kian pan la. Visena nena pisa sanini, sape Ninuna naņa mla visena pan yaru naga pe mņareran re yaru poli, ana naga monar logear ga manmaruaena kiena yaru nene naņa pisawal ke visena nene. ³³ Visena nene kana kinasa asape monar teyuņae e ĩelaga wo sa naņa Ntewa naga sinenania, komin naga pe suņa miyuņae kar re poli amio kiena naņareraena, ana suņa miyuņaeen ke sur punu ga torokin ĩelaga na suņarena.

A popon akila ve sa naņa ĩegas nen li nalelagaena wa taņena lala asuņa akila, ³⁴ naņa pogos na lotena, akila naņa sira lala apa ruru

la ga asuũa ga. Pe atañan re sira la asuũalu poli vena avis e marana yermene lala, komin sa naña navisaluaena marua pisa, sira lala monar ve asu re metava taulu yermene lala. ³⁵ Visae sira la sinelan kiliaen suria, pe pon re aviun manene naviunena poli pona avisawal manene kiela sitomena loyũa e suũare, ana visae ava uũa narui, akilia aviun ga va wola la na wa.

³⁶ Nanene kiau visena lañasa naña pan amiu, ana pe pon re kam lañasa asitom asape nepisa sur nene pe memes re poli. Pe kamiu re naña Visena Wa kiena ne Ntewa pimi ães pan amiu poli, a pe kam re ga naña atol poli. ³⁷ Visae kam yar tai sitom visave naga yar na visawalen visena kiena ne Ntewa, pona naga pe yar naña sitom ke sape naga taveve ke mrapa naña Ninuna Wa kila pe merarava pania, naga ke narui naga po, ana visae ve sa kemua nene, yoko naga monar visu kilia visave sur la naña nesuũa nesiriyu ke pan amiu, ape visena kiena Suũa kemua lelaga. ³⁸ Ana visae naga ve visu kilale re sane kiau siriena la nene ape visena lelaga kiena Suũa, yoko monar ve atañan re si naga yuũae amio amiu.

³⁹ Pogaga, monar asitom ruru kiau visena lala, nesape amãareran naña vena atol namãareraena na visawalen visena kiena Suũa, ana visae la ãasa atol namãareraena na visena kome visena tañena naña Ninuna Wa kian pan la, monar ve avisaluñar la re avisave kilaen toko. ⁴⁰ Ana visae akila nene, pona ya sina, ana monar akila sur make ga taveve kana mrapa naña memes ruru

po.

15

Sumñalen sina e marena

¹ Erau lala, sineun nesape nevisayu si Lologena Wo naña nepim nemlologon pan amiu rui, naña amlavia, asumña asumñal ke mñarera ea, vena kila amiu ve sinemiu p̄esan re. ² Lologena Wo nene na naña visae asumña amlarar ke mñarera yo wa, naga sunña kila ke naña atol kiamiu natamaliaena. Ana visae ve atarar re si mñarera torokin ya naña nemlologon pan amiu, pona visae avilon ve ve tañena, kana kinasa sane amlelaga nanua sumo ana amlelaga korenan ga.

³ Lologena Wo naña amla p̄esan pan inu nanua sumo, nane nemla narui, nepisawal ke pan amiu ne. Kana pupia visena ne lala apisayu Kristo, naña naga kila maran taaga sa ke naña Nasiriena Wa pisayu nakonua rui sape yoko naga kila, pogos naña naga pe pitomi re poli wa. Pa sanini, sape Kristo, naga mare wo ita vanon kieta mlamulena viowa lala, ⁴ siraunia amligan naga m̄ene puluve, siraunia e kana legiena na telu sumñalu mal sina, ⁵ a siraun naga nene naga m̄alivi p̄esan e marana Keñas, siraunia, naga m̄alivi ke sina ga e marana la lualima yam taaga pa lua. ⁶ A siraun naga nene, pogos si tai naga m̄alivi e marana p̄egas nen li na lelagaena lala, la taulu ponotia lima [500], naña la mok liu amal ke ga wa tol nagane, ana lañasa akokovio rui. ⁷ Ana

15:4 Mat 12:40; Yumñaena 2:24-32 **15:5** Luk 24:34, Mat 28:16,17; Mak 16:14; Luk 24:36; Yoan 20:19

siraunia, naga m̃alivi sina ga e marana Semes, siraunia m̃alivi e marana nalologena taṓena lala, ⁸ ana siraun nene, naga ṓasuṓe si pa ma e peni. In na pe nesu re e poglis nene poli, ana potena paṓisi naṓa siraunia, Suṓe m̃alivi si yam tai, naṓa naga m̃alivi maro nenaga, m̃alivin inu. ⁹ In na pe netorokin re naṓa naga kila sanene van inu poli, komin naṓa e nalologena make ga, in na nesumaro tano, a in na pe netorokin re nena kia nene poli, komin nanua ne in ke narui naṓa nesuṓa nom̃ene ke ṓegas nen li na lelagaena lala kiena ne Ntewa. ¹⁰ Ana Ntewa naga pe lemam pan inu paṓisi, pisirlua inu e yo naṓa nesike e nagane, a naga pe lemam korena re sanene pan inu poli, komin naṓa nekila ke kiena yuṓaena kerkeviu la moki. Lelaga, pona nekilia nevisave in na nekila ke yuṓaena pa laa sane taulu make taṓena lala, ana pe in re naṓa nekila ke poli, ana lemamiena kiena ne Ntewa ne nanene narui naṓa sike e inu, naga ke narui miyuṓae ṓarpoyo kome kiau malena. ¹¹ Ana in na pe nesitom manene re nesape in na nemiyuṓae ke sanape, pona nalologena taṓena lala amiyuṓae ke sanape, ana pupia sur nena sane memlologon Lologena Wo pan amiu, ana amlelaga ea.

¹² A pogos naṓa memlologo ke sanene pan amiu, mepisawal meraravan ruru pan amiu mesape Kristo, naga mare, ana siraunia mal sina. Ana komin naṓa mekila ke sanene, nemilan paṓisi naṓa nemloge sane kam la ṓasa asuṓa

apisape pogos naña tokovio, asin ita, ana yoko temare lue, ve temal re si pogos tai. ¹³ Sitomena na sanene pe memes re poli, komin naña visae asunña avisave pe yaru re tai naña kilia sunñalu si poli, kana kinasa sane Kristo mña pe sunñalu re si poli. Ana peraga, Ntewa pisirlua naga mali si rui. ¹⁴ Visae naga ve visirlua re Kristo, kila sane memlologon korenan ka ga Kristo pan amiu, a amiu mña amlelaga korenan ga. ¹⁵ A visae ve sanene, kila sane pogos naña memlologon ke sanene pan amiu mesape Ntewa pisirlua Kristo mal si rui, mepisokan pañisi e kia kiena ne Ntewa, pona mepian amiu ke e sur tai naña pe lelaga re poli. ¹⁶ Visae lelaga naña sane yar mare tañatete si mali, kana kinasa sane Kristo mña ga tañatete si mali. ¹⁷ A visae Kristo mare mon mña sanene, kana kinasia sane kiamiu naviawaena pe sur korena ga, a kana kinasia sane kiamiu mlamulena viowa la sike e amiu na wa. ¹⁸ A visae Kristo ve mal re mña ga si sanene petan marena, kana kinasa sane kieta erau la naña amlelaga ana akovio rui, apa e yo viowa rui, komin pe yar re tai naña kilia tamalia la poli. ¹⁹ A visae kieta lelagaena e Kristo sunña miila ita e ga e yomarava nini, ana tañatete iila ita e pogos naña tokovio ea. A visae Kristo tañatete tamalia ita e pogos naña tokovio e yomarava nini, yoko viowa manene van ita, sineta ye kare ita vañisi.

²⁰ Ana peraga, pe sa re nena nene poli, nekilia nevisa memesu nevisa ve lelaga, Ntewa kila si Kristo mal si petan marena, a pisirlua naga sane pe mras ñesa kiena li na lelagaena make ga, naña visae akovio pogos tai, ana yoko Ntewa

kilia kila amal sina ga vetan marena. ²¹ Nanua e purp̃esa, yar p̃esa naṗa Atam p̃ere marena pimi e yomarava, ana nagane, yar taṗena nene naṗa Kristo p̃erelua malena petan marena pimi. ²² Taveve ya naṗa Atam kila, yeririna make ga na yomarava monar amare, ana taveve ya ne Kristo kila, yeririna make ga na yomarava akilia alual malena. ²³ Ana sur make ga kala pog mesmesu sike ne, komin naṗa Kristo naga sumon naṗa suṃalu p̃esa e marena, ana ita li na lelagaena lala yoko tesuṃate ṃa vano-o tol pogos naṗa naga wasuṗe sina, ana yoko ita ṃena tesuṃalu e marena. ²⁴⁻²⁵ Ana siraun nene yoko naga wereplan ninuna viowa lala amio yermare lala na yomerava, a yoko naga taaga ve p̃arin suṗen sur make ga, vano-o taulu naṃareraena viowa taṗena lala asike vatanon lana. Pisi yoko naga war nasuṗenen wetelu e sur make ga wasuṗe si va Ntewa Arimana. ²⁶ A e nasinekar la naṗa yoko Kristo taulu e pogos nene, naṗa yoko naga taulu maronia, sur nene marena, amio kiena naṃareraena viowa lala. ²⁷ Kristo monar taulu marena nene, komin visena na metava ne pisa sanene rui, sape yoko Ntewa ligan sur make ga su vatanonia. Ana visena nene kana kinas pe pisa re sape Ntewa mligan ke sina ga naga sike vatanon Kristo poli, ana pisayu sur taṗena lala, naṗa yoko Kristo taulu make la nenaga. ²⁸ A pogos naṗa Ntewa mligan sur make ga sike vatanon Kristo sanene rui, yoko Kristo, sane narina Ntewa, mligan sina ga naga vatanon Ntewa, ana yoko kila naṗa Ntewa naga taaga ve Ntewa na sur make ga.

²⁹ Nowasuþe si neva e visena naþa nepisayu nesape visae temare, yoko siraunia tesuñal sina. Ana laþas naþa amlelaga sa nene, la asitom manene kiela erau la naþa pe akeela li re poli wa, ana amarmare. Asitom ke asape la nene taþatete atol malena, kila narui akee la sina e kia kiena ne kiela erau lala naþa amare rui. La akila ke sanene, komin naþa amlelaga m̃arera asape visae temare, yoko tesuñal sina.

³⁰ A imimi m̃ena ga maran taaga, asitomli sane komin ya ne mesuñã moñal pog m̃arera lala e pogos make ga? Mesuñã moþar ke naloge viowaena la sanene komin ga memlelaga m̃arera mesape visae yaru tai mare, yoko naga kilia mal sina ga vetan marena. ³¹ Lelaga erau lala, mesuñã memiyuñãe ke sanene, nekilia nevisa mesmesun sane nemloge sane nesuñã netam̃an ke kiau malena vanon amiu e legiena make ga. Ana nanene pogaga, komin nekekara na nekekara e malena naþa atolia amio kieta Suþe Yesu Kristo. ³² A pogos naþa nesike e pulkumali naþa Episas, þarm̃arera lala nae yo nene la asaga lokul tetan lala, asuñalun inu lue ga, ana komin ya ne nesuñã nepisaluþar la? Nesuñã nekila ke sanene, pe netaulu re nena sur wo tai na malena na yomarava nini, ana nesuñã nekila ke sanene komin nesitom̃al ke malena na pimi ke sirau.

Visae ve malena re nene, popon teve sa ga yar kar taþena la naþa pe amlelaga re poli, naþa la asuñã apivis ke sanini, asape, “Pane, tekila þaþagena, ve tesitom re sur tai, komin naþa peni, ane kilia? Visae temare na þisi narui, yoko

tařatete tekilia sur tai.”

³³ Ana monar ve ataveve re sitomena na wowe la ne sanene, visae peraga, yoko visena tařena nene imi ve lelaga e amiu, nařa pisa sanini, sape “Oyaloro omio erau viowa lala, yoko kiela napiowaena kila kare kiořa řelaga wo.”

³⁴ Monar aim ave manmarua, a monar aligan kiamiu mlamulena viowa lala. Nepisa sanene, pona asitom ke asape nekila kare kiamiu kia yo, ana monar nevisa, komin kam lařasa pe akilia ruru re nena mrapa mesmesu lala kiena ne Ntewa poli.

³⁵ Ana e lepas na malena si e marena, yoko lařasa aviun sanini, avisave “Yoko akila si yar mare la amal e marena ve sanape?” Pona yoko aviun sanini, avisave “La nařa amare nakonua rui, yoko asumal sina amio tasnela na sanape?” ³⁶ Ana naviunena la ne sanene ape naviunena kiena yar nařa pe kilia re sur poli. Visae tesitomli narin kurus nen sur la nařa tesuřa temapila ke ne, yoko telual kana navisatařeena. Pogos nařa omapila narin kurus tai vito e porotano, okilia rui osape kurus nene monar menun, monar mare, ana siraunia, yoko sirus viu kilia kapur komea. ³⁷ Sur nařa omapila, naga kurus ga tai nařa yoko sike e porotano, ana sur nařa yoko kapur marea ve urviu sina, naga ve sur tařena. ³⁸ Sa nařa omapila ke kurus la pepe tařena ana Ntewa suřa kila sirus viu lala pepe tařena, ³⁹ a maran ve taaga e sur mali lala, nařa tasnela la pepe tařena. Tasnena yaru kana tata pe tařena, a surmali lala sane na porotano,

na si, po na metava, la peve taaga tata taņena la sike e la. ⁴⁰ A surmali la nene, tasnela lala pe taņenan manene laa e tas nen sur taņena la naņa asike ma e sinapane, ⁴¹ sane mrae, kupario, amio verue lala. La telu nene, tai marana pe taņenan maran taņena, a maran taaga mņena ga e lepas na verue lala, naņa tai, marana pe taņenan taņena.

⁴² Ana sur make ga la nene, tepisu naņa Ntewa kila la ape taņena manene laa, a sur nene þar totou na tasneta, kiena ita la naņa tokovio, naņa tekilia tokusia pogos naņa tesuņalu temal sina. Tasneta vito e pulus nen porotano, sane kurus tai naņa amapla, naņa monar menun, ana siraunia, tasneta viu naņa molue yoko taņatete si imi viowa pogos tai. ⁴³ Tasneta naņa vito e porotano, tepisu piowa ga, a pororovia, ana tasneta viu naņa mņalivi sirau, yoko tevinaia vaņisi, a mņarera ruru wo. ⁴⁴ Sur naņa vito e porotano, naga e lepas na tasneta ga ne, ana sur naņa mņalivi sirau, naga e lepas na ninuta. ⁴⁵ A tekilia tesitoņal mņena yar na sumo naņa Ntewa siia, naņa Atam, amio Atam maro naņa mligan e yomarava, naņa Kristo. Visena tai pisape Atam, Ntewa kila naga pimi amio tasnena tai naņa mali, ana Kristo, Ntewa kila naga pimi amio ninuna tai naņa pe purþes nen malena. ⁴⁶ Taveve nene, tepisu naņa sur na lepas nen tasia pimi þesa, ana sur na lepas na ninuna, pimi maro. ⁴⁷ Yar na sumo naņa Atam, Ntewa sii naga molue kome porotano na yomerava nini, ana yar na lua naņa Kristo, Ntewa mligan naga kom ma e peni pitomi. ⁴⁸ Ana ita yeririna taņena lala, ita naņa tepe na

yomarava, tokus ke ðelaga kiena yar na sumo na yomerava nini, ana ita naþa tepe nae ma e peni, tokus ke ðelaga kiena naga naþa pitomi ma e peni. ⁴⁹ A ita naþa temlelaga, sumo tokus maran yaru na yomerava, ana nagane tokus ke maran yaru nae ma e peni. ⁵⁰ Erau lala, sur naþa kate ga e yomarava nini, sane tasneta, taþatete va loyuma e nasuþenena kiena ne Ntewa nae peni, a sur naþa yoko va kovio, taþatete va tol yo naþa sike sike lue.

⁵¹ Ana yoko ve sanapen li na lelagaena lala naþa amal ke ga wa, pogos naþa Kristo wasuþea? Sur nene, pe yar mok re naþa akilia poli, ana yoko nevisawal mesmesun van amiu. Lelaga, ita li na lelagaena laþasa yoko ve temare re e yomarava nini, ana e pogos nene, yoko tasneta vilopu nena veraga sa ga yekarpla. ⁵² Sa naþa toþelawa ve plas ga, yoko teilan ga kumasua yelu, a yoko li na lelagaena la naþa amare pa rui yoko asuþal amal sina amio tasnela viu, a ita mēna naþa temal ke e pogos nene wa, tasneta mēna lala yoko imi ve urviu. ⁵³ Tasneta marua monar vilon ve sanene, komin naþa sur na yomerava monar imi ve sur nae peni a sur na marena monar yoko imi ve sur naþa mal nalue. ⁵⁴ Ana pogos naþa toþar tasneta viu na sanene, yoko kila visena na Siriena Marua tai imi ve lelaga nenaga, naþa sape

*“Naþareraena na malena kiena ne Ntewa
mēnelua nena na māreraena na marena.”
Ais 25:8*

⁵⁵ E pogos nene, yoko tevisa lele kare sur naña marena p̄isa, tevisa sanini tevisave

“Marena, ko sinoñan osape otauluia, ana nagane kioñã kap mare. Kioñã nenos naña nayur imimiena sike pe nagane?” Ose 13:14

⁵⁶ Yoko tevis sanene komin navisaluaena naña sike pa rui, naga mla m̄areraena pan p̄elaga na mlamulena viowa loyuñã e kieta malena, naña kila ita tepim sane yar lala na kilaroen navisaluaena, a kieta p̄elaga na mlamulena viowa nene mla na m̄areraena pan marena vena ve sa nenos naña kilia yurm̄ar ita. ⁵⁷ Ana potena pa Ntewa pañisi, komin naña naga kila naña kieta Supe Yesu Kristo taulu m̄areraena navisaluaena a m̄areraena na mlamulena viowa a m̄areraena na marena, kila tetol malena naña ve uro re.

⁵⁸ Erau nowo lala, komin naña Ntewa kila po pan ita sanene, asum̄alu m̄arera, ve akulkulu kar re, a ayuñãen ruru yuñãena kiena kieta Supe amio kiamiu nam̄areraena wetelu. A pogos naña akila ke sanene, popon asum̄a asitoñal sane kiamiu yuñãena nena ve ve sur korena re, ana yoko monar war mrasa sa naña Supe sinenania.

16

Kilavaru naña akoania va li na lelagaena lala nae Yerusalem

¹ Sineun nesape nela visena laṗasa van amiu e lepas na warpoloen kilavaru vena iilaen li na lelagaena lala nae Yerusalem, naña apane ke pogos m̄arera, limala korena ga e poglis

nene. Nemla visena pan suñare kar make ga e lepas nae Kalesia rui, a nagane sineun nesape nevisawal van amiu narui. ² Sineun nesape nevisa sanini, nesape ve asusu koren re asuñã sanene va tol pogos naña neiñasu nomãalivin amiu ana awarpolo ga nalaena na wa, ana sineun nesape siar nagane, e legiena ðesa na legiena olua make ga, kam veve taaga monar ala narin kinakinas nen ya naña amlavia, ana monar aligan ruru toña ga. ³ Ana pogos naña neiñasu, yoko towarpolo narin kilavaru la nene imi lele taaga, a yoko akilia akilalua yar laþasa awar nalaena nene va gar Yerusalem. A yoko nesiri mñaki laþasa awararia va va li na lelagaena lala gar ne, vena visawal amiuena van la. ⁴ Nemninue ke ga wa pona inu mñena nemio la yo, ana yoko nevisulia wa.

Mrapa kiena Pol

⁵ Pogaga, kiau mrapa sanini, sineun nesape neva nokom e lepas nae Masitonia sumo, ana suraunia yoko neiñasu nomãalivin amiu. ⁶ Nemninue ke ga wa nesape yoko nesike nemio amiu va tol pogwai, ana nesitom ke nesape nesike nemio amiu e pogos na miava na pimi ke ne, ana siraun naga nene, akilia aligan inu si e kiau mrapa, vena neva si e nape naña yoko neva ea. ⁷ Pe sineun re nokom pun amiu nagane poli naña nesuñã nepanon ke Masitonia, komin visae ve sanene, yoko nekilia nesu yam ve plas ga ne, ana yoko neva ke ne gare sumo wa, siraunia neiñasu, komin naña visae Suþe

tañania, nekekaran naña yoko nesu towe laa nemio amiu ve piavi. ⁸ Nagane nesike Episas, a yoko nesu towe laa e nini na wa, tol pogos na Paņagena na Yui Marua warovia. ⁹ Kiau pulmas na kilaen yuñæena wo la e nini moki ke wa, a suri si tai, nasinekar mñarera mñena la mokliu asike e nini, ana pe nekilia re poli naña nekilia neyal pogwai.

¹⁰ Visae avisu Timote imi mñalivin amiu, awis, awo vania, akila naga logewon naña sike amio amiu, komin naña naga kila ke yuñæena kiena Suņe, maran taaga sa ke inu. ¹¹ Ve atañan re kam laņasa avisusu viowa e naga, ana avisuar ruruia e ãelaga na suñare, siraun aligan naga e kiena mrapa vena naga kilia wasuņe ruru imi pun inu, komin nesuñate ke nesape vena naga amio wolai taņena lala aim aworu e nini.

¹² E lepas kiena ne kieta puruvi naña Apolos, nepiun manene pania vena naga taveve puruvi taņena la nene aiñasu pun amiu, ana kiena sitomena mñarera sape naga nene pe kana pog memes re poli naña mñalivin amiu, ana visae kana pog nena, pona yoko naga sirau iñasu.

¹³ Erau lala, lavis ke kiau visena ãisi narui, ana sineun nesape nevisa van amiu sane amiu avisuar ruru amiu, asuñal ruru ase kieta lelagaena, ve sinemiu kurkurun re suria, ana añarera. ¹⁴ A suri make ga e naña akila, monar akila e ãelaga na sinesiena.

¹⁵ Popon avisu kilale Steņanas nene amio kiena namratava lala, amio yuñæena naña asuñæ

akila ke ne. E yeririna nae make ga e kiamiu lepas nene, Akaea, la ke nene narui la amlelaga p̄esa. A siraun nāpa amlelaga, asum̄a akila ke yum̄aena wo pāp̄isi, asum̄a amiila ke li na lelagaena lala pimi tol nagane. ¹⁶ Yar nowo la ne sanene, popon avisir plan la vena asumon amiu, a popon avatanon m̄ena yeririna tāp̄ena la nāpa amiyum̄ae ke lele taaga amio la. ¹⁷ Stepanas nene pimi m̄alivi e nini rui, naga pimi amio Posanatas a Akaekas, a nekekaran la telu pāp̄isi. La asum̄a amiila inu ke e suri moki, torokin ke ga nāpa amiu m̄ena akilia akila visae asike e nini. ¹⁸ La telu nene akila po pan amiu rui, ana pogos nāpa apam e nini akila inu m̄ena nemloge po pāp̄isi, apisirlua kiau sitomena. Popon avisa potena ve keviu van la komin kiela pupia yum̄aena wo na sanene.

¹⁹ Sum̄are make ga lala na lepas nini nae Esia asape asum̄a asitom amiu pāp̄isi. A kieta erau lua nene, Akwila amio wona na sira Prisila, amio yeririna lala na sum̄are nāpa e m̄ala um̄a, la apisa pokolulagi a pokolemalo pan amiu e kia kiena Sūpe. ²⁰ Kieta erau lala nae yo nini akekaran navitawe amiuena e m̄aki nene, a amiu m̄ena, pogos make ga nāpa avitawe amiu, popon asum̄a atalopan amiu a asum̄a aviran pipimiu, vena akekaran amiu amio sinewo.

²¹ Ana siar e narin yo nini, inu Pol nemlarar ke pensel nesum̄a nesiria vena nevisa kiau visena māro van amiu. ²² Monar sinemiu sii ke m̄ena Sūpe ve lelaga, visae peraga, yar nāpa ve sinena sii re naga, visaarena na marena sike e naga.

Nesuũa nemlen ke sanini, nesape Suũa Yesu, awis, otom vilaga, ²³ a nesuũa nemlotuwo amiu ke mũena ga, nesape lemamiena kiena kieta Suũa Yesu sike amio amiu. ²⁴ A sane silaga, nekilia nevisa e kia kiena Kristo Yesu sane kiau sinesiena van amiu keviu sulue ga suũa ga. Kiau mũaki ãisi ga e nene narui,
Inu, Pol.

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 3 Mar 2023 from source files dated 22 Nov 2019

ee028e1c-7e53-571d-8041-681daaf580e8